

# KUSUKA NTIMA



Beto bikana ya kutelama ntangu yayi mutindu beto ke kulumusa bayintu ya beto.

Mfumu Yesu, beto ke kwikila kaka. Nge me tuba na beto kaka na kukwikila, mpe beto ke kwikila ntangu yayi. Mpe beto ke vutula na Nge matondo mpe lukumu samu na yina beto me kuwa yimeni mpe me mona, yina ke kanga lukwikilu ya beto. Wapi mutindu beto ke tonda Nge samu na ntangu ya mbote yankaka ya kukwiza na kulonga na bayina kele na nsatu. Ntangu yayi mu ke sambila Nge, Nzambi, samu na kupesa bansatu ya beto na nkokila yayi landila nsilulu ya Nge. Na Nkumbu ya Yesu beto me lombu yawu. Amen.

<sup>2</sup> Beto ke na kiese mingi na nkokila yayi samu na bweso yayi ya kuvutuka diaka na tabernacle, na—na . . . na Nsangu ya mbote ya Mfumu Yesu yina vumbukaka na lufwa. Mu vwandaka kaka fioti na nsukinina. Mu vwandaka na dyambu mosi ya mfunu kuna na Michigan kaka na ntangu yayi. Mpe Mfumu salaka kima ya mbote kaka kuna samu na yandi. Oh, mutindu Yandi zaba nyonso mpe ke tulaka kaka yawu . . . Beno fwana tuba na Yandi ve; Yandi zaba, Yandi zaba kaka yinki ya kele. Mpe na yina beto ke vutula matondo mingi. Bantu yina me nata ditoma kilumbu ya muvimba samu na kukuma awa. Mpe, na yina, beto ke vutula matondo mingi samu na yawu. Ntangu yayi, beno zimbana ve . . .

Yayi ke na kubakamaka na bande? [Mpangi Neville me tuba, “Ya kele na mwinda ke na kupela kuna.”—Mu.] Oh, mwinda ke na kupelaka. Mu me mona.

Beno zimbana ve balukutakanu ya sabala yayi ke kwisa, na Kilumbu ya tatu na nkokila, mpe na Lumingu ke kwisa na suka, mpe na Lumingu na nkokila. Kana beno kele awa, na nziunga, mu zaba ti ya kieleka ba ke sepela na kuvwanda na beno awa.

Mpe ntangu yayi, beno sambila samu na munu, mutindu mu ke kwenda na nzila ya munu bisika nyonso, mpe mu banza ti mu ke vutuka dyaka nswalu.

<sup>3</sup> Mu zola kutonda beno nionso samu na lutondo ya beno mpe balubambuku ya yina beno salaka samu na munu. Mpe mpangi-bakala mosi me tinda munu kazaka ya malu-malu yina me katuka kuna na mwa yinzo-Nzambi mosi ya fioti na Georgie. Mpe—mpe bantu yina . . . Ya kele kaka ya mbote. Mpe mu zola kutonda bantu yina kele kuna na Kentucky, yina mu vwandaka na bawu na sabala me luta na konze. Mpe nyonso yina Mfumu salaka samu na beto kuna, diboko ya nene, ya ngolo yina beto monaka Yandi, yina Yandi salaka.

<sup>4</sup> Ntangu yayi beto ke na kivuvu na kumona beno diaka ntama mingi ve, kaka na ntangu mu ke vutuka mutindu yayi, mu ke

kwenda na New York samu na lukutakanu. Ya kele na Stone Church na Mpangi Vick, mu banza, mu ke kwikila ti ya kele na Ngonda ya kumi na mosi na kilumbu ya kumi na zole. Mpe beto ke vwanda awa, bilumbu fyoti na ntwala ya ntangu.

Na yina beto ke vutuka diaka, samu na kukwenda na—na Shreveport, na Louisiane, na Mpangi Jack Moore. Ya kele na ntangu ya Kuvutula matondo, na Sabala ya kuvutula matondo, na kuvwanda kuna na Shreveport. Ya kele na tablo ya bansangu, mu banza, kuna na manima na baluzabusu.

<sup>5</sup> Mpe na yina beto ke na kivuvu ti beto ke vwanda na bankundi ya Sude na manima ya Nowele. Mpe beto ke vwanda na Phoenix na Ngonda ya ntete. Mpe na manima beto ke vingila mbokolo ya bayinsi ya nzenza, samu beto lenda kukubika balukutakanu samu na bayinsi ya nzenza. Ba ke na kusalaka na zulu ya yawu ntangu yayi, na ngonda yayi me luta, Mpangi Borders, ke na kusunikaka na ntwala mpe na manima, na nzietolo ya yinza ya muvimba samu na kubanda na nswalu nionso mutindu beto lenda kukubika yawu, kasi beto fwana vingila ba-condition.

<sup>6</sup> Bankonga ya bantu kele ya kulutila mingi kuna, beno lendaka ve kukotisa bawu na kati ya bivinga; beto fwana kaka kutula bawu kuna na ngaanda na kisika. Mpe bantangu yankaka bawu ke lutula mingi, ya kele kaka ya kuyituka na bantalu, bantangu yankaka tii na bankama tanu ya mafunda. Ya kele ndambu ya difuku mosi ya bantu na kati ya kimvuka mosi; ya kele ve bantu yikwa ke kwisaka na lukutakanu na bilumbu mingi, kasi na kimvuka mosi. Beno zaba, ba-evangéliste ke tangaka bantu yikwa kwisaka na balukutakanu na basabala sambanu. Beno me mona? Kasi beto—beto ke tangaka kaka bantu yikwa kele kuna kilumbu yina, na mbala mosi. Mpe na yawu bantangu yankaka ya kele ve na kisika samu na kuvwandisa bawu, beno zaba, beno fwana kaka kutula bawu na ntoto.

Mpe beto fwana kuzwa bansungi kisika mvula ke noka ve mpe ke mwangisa mvula. Mpe bantu yina ya mputu vwandaka kuna. . . Mu monaka bakento ya kuvwanda kuna na bansuki ya bawu ya kukanga na manima, bantu yina me lwata mbote, mpe kaka—kaka ya kuvwanda na kati ya mvula yinda kilumbu ya muvimba ya yinda. Kaka ya kuvwanda kuna, mpe ya ke tiamuka kaka, mpe nzasi ke na kubula, mpe bansemo ya nzasi ke lezima, mpe bitembo ke bula, mpe bawu vwandaka kangama na ntwala mpe na manima mosi na yankaka mutindu yina, ya kuvwanda kaka kuna, vingila tii beno ke kwiza sambila samu na bawu. Beno me mona? Ntangu yayi, beno zaba ti Nzambi ke zitisaka lukwikilu ya mutindu yina. Yandi ke salaka yawu.

<sup>7</sup> Beno fwana sala kima mosi samu na Nzambi kuzitisa yawu. Beno me mona? Beno ke lakisa Yandi. Bantu yina ba ke pesaka

bima nionso na maboko ya bawu kukondwa mpasi, bawu ntangu nionso ke salaka ve. . . Bawu—bawu ke salaka kima mosi ve samu na yawu, beno me mona. Beno fwana. . . Dikabu kele ya mpamba, ya kele kieleka, kasi beno fwana—beno fwana. . .

<sup>8</sup> Ya ke monana mutindu yina, beno zaba, mutindu ba ke tubaka, “Kana beno me butukaka na lutu ya palata,” beno me kuwaka yawu, “beno ke sepela na yawu ve.” Kasi ntangu beno fwana sala samu na yawu, beno ke sepela na luvalu ya yawu.

<sup>9</sup> Ntangu yayi beno bantu yina ke na ba-bande kuna, mu zola ti—ti. . . Mu banza ntangu yayi ti mu. . .

Na suka yayi, nsangu ya suka yayi vwandaka, samu na munu, Nsangu ya nene ya ministele ya munu ya muvimba; na suka yayi, beno me mona, Nsangu ya nene ya ministele ya munu ya muvimba. Kilumbu mosi mu ke tuba na beno wapi mutindu ya kwisaka. Mpe mu zaba ti bima nionso me salaka bangonda mpe bangonda mpe bangonda, tii kuna na Nsangu yina mosi, ke landila na kukwisa tii na kisika yina. Yina vwandaka ntangu ya kusukisa samu na yawu, beno me mona. Mpe ya kele. . .

<sup>10</sup> Ntangu yayi mu ke kwikila, to mu ke na kivuvu, ti beno kele na yina Kidimbu zola kutuba. Beno me mona? Kidimbu kele kidimbu ti ba me tula Menga. Ti, ba me futa ntalu yina ba me lombamba, yina Nzambi lombamba, Yesu futaka ntalu yina na nzila ya kutiamuka Menga ya Yandi Mosi. Yandi salaka yawu. Na yina, na luzingu ya Yandi kwisaka Mpeve-Santu. Mpe ntangu Menga me tulama na beno, Mpeve-Santu kele Kidimbu ti ntalu ya beno me futama; Nzambi me yamba beno, mpe ya kele Kidimbu. Beno bambuka moyo, ya kele Kidimbu. Ntangu yayi, ya kele na bantu mingi yina zaba ve, bawu—bawu zaba ve yinki Kidimbu yina kele, beno me mona. Mpe beno fwana sala yawu mutindu yina ti muntu mosi ve zaba yawu, beno me mona, na yina bawu nyonso ke bakula yawu.

<sup>11</sup> Kaka mutindu kulonga mpulusu, beto fwana kulonga mpulusu na mutindu ti muntu nyonso, ya kele samu na muntu nyonso, na yina, beto zaba ti ya kele ve mutindu yina. Beto fwana kulonga kubeluka ya Kinzambi samu na muntu nyonso, kasi beto zaba ti ya kele ve samu na muntu nionso. Beno me mona? Yesu kwisaka samu na kuvulusa bayina vwandaka na kati ya Buku ya Mpulusu na ntwala yinza kusalama. Yandi kwisaka kaka samu na kuvulusa bayina. Nani bawu kele, mu zaba ve. Beno me mona? Kasi beno. . . Muntu ve lenda vwanda na lukwikilu kana ti beno tuba ti ya kele samu na muntu nyonso; mpe ya kele, muntu ve lenda kwiza kana ti Nzambi me bokila yandi. Ya kele kieleka. Na yawu ya kele na bantu mingi yina ke kuzwa mpulusu ve. Beto zaba yawu. Bawu, mbote, Nzambi zabaka yawu ntete yinza kubanda, ti bawu ke kuzwa mpulusu ve.

<sup>12</sup> Ya kele na mingi yina ke beluka ve, beno me mona, mingi ke beluka ve. Ba lenda kaka ve, ba lenda bakula yawu ve. Bawu

zaba ve yinki ya kele. Mingi ya ke vwanda. Kasi beto ke longaka yawu ti ya kele samu na muntu nyonso, samu ti beto zaba ve nani kele muntu yina; beto zaba kaka ve. Kasi ya kele muntu nyonso, kasi bantu yankaka lenda kaka ve kubakula lukwikilu yina.

<sup>13</sup> Ntangu yayi, mpe kima mosi samu na Kidimbu yayi. Kidimbu, beto me tubila na zulu ya Kidimbu ntangu nyonso, kasi ntangu yayi kele kumonisama ya Kidimbu. Beno me mona?

<sup>14</sup> Ntangu yayi, beto bantangu yankaka me pesaka yawu muswa. Ba-Lutherien pesaka yawu muswa, “Kundima Ndinga; kundima Klisto mutindu Mvulusi ya yandi mosi.” Ba-Méthodiste tubaka, “Ntangu beno ke kuma na kyese mingi na kuboka, beto me kuzwa Yawu.” Bantu ya Pantekote ke tuba, “Kuzonza na bandinga, na yina beno me kuzwa Yawu.” Mpe beto ke tala ti nyonso ya yawu vwandaka luvunu. Beno me mona?

Kidimbu kele Kidimbu. Ya kele beno mpe Klisto mutindu bantu ya kintwadi. Beno me mona? Ya kele Mpeve-Santu, Luzingu ya Yandi na kati ya beno, ke na kusalaka Luzingu ya Yandi—ya Yandi Mosi na nzila ya beno. Mpe ya kele samu na mvwama, mputu, to samu ti muntu yina zola kuzwa Yawu. Ntangu yayi beno bambuka moyo, Kidimbu kele yina beno . . .

<sup>15</sup> Beno ke kwenda na kompani ya nzila ya kisengo mpe beno ke sumba tike ya beno. Ya kele na ntalu, ya kufuta. Beto tuba ti ya ke na ntalu ya ba-centime makumi tanu samu na kutambula na nzila yayi ya bisi, to nzila ya kisengo, kubanda awa tii na—na Charlestown, na Indiana, ya ke na ntalu ya ba-centime makumi tanu. Mbote, ntangu yayi, kompani me tula bidimbu samu ti . . . Beno me mona? Ntangu yayi, kima yina beno ke sala, beno ke kwenda kuna mpe muntu ke futila beno tike, ya ba-centime makumi tanu. Ba ke pesa beno kidimbu mosi yina ke pesa beno muswa ya kumata na zulu ya train tii na kisika yina yawu ya ke suka, kisika ya ke kwenda. Beno me mona? Ya ke pesa beno . . . Ya kele kidimbu.

<sup>16</sup> Ntangu yayi, dyambu yayi, menga vwandaka kidimbu. Kieleka, ba zolaka kutula yawu, samu ti ya vwandaka kaka element chimique yina ba vwandaka na yawu, samu ti ya vwandaka menga ya mwana-dimeme, kibulu, menga ya mwana-dimeme. Na yawu luzingu yina vwandaka na kati ya menga, luzingu yina basikaka, na yawu menga tiamukaka. Beno me mona? Luzingu basikaka, kasi ya lendaka vutuka ve na zulu ya mukwikidi, samu ti ya kele kibulu. Kasi ya vwandaka tubila kaka konsiansi ya mbote, ti ya vwandaka na Mosi, Munkayulu ya kulunga.

Mpe, samu na kukumisa yawu Mosi ya kulunga, Zuzi ya muvimba, Nzambi ya Mazulu, kumaka Munkayulu; Zuzi, Lusambusu, mpe Nzongi. Beno me mona? Yandi kumaka Munkayulu. Mpe kuna ntangu Luzingu ya Yandi basikaka, yina vwandaka Nzambi . . . Mpe ndinga kuna, kisika ya ke kwiza,

“Mpe Mu ke pesa bawu Luzingu ya Kukonda nsuka.” Ntangu yayi, na Grec . . . Mu zaba ti mu ke na kuzonzila na bantu ya mayela mingi. Mu ke mona zole to tatu. Beno me mona? Mpe mu . . . Mpe mpova yango na Grec kuna, kele Zoe. Z-o-e, na Grec, yina zola kutuba, “Luzingu ya Yandi mosi Nzambi.” “Mpe Mu ke pesa yandi Zoe, Luzingu ya Munu Mosi.” Klisto mpe Nzambi vwandaka Mosi.

<sup>17</sup> Na yina, Luzingu yina vwandaka na kati ya Klisto kele Mpeve-Santu, Muntu ya tatu ve; kasi Muntu mosi, na mutindu ya Mpeve-Santu, ke kwiza na zulu ya beno, mutindu Kidimbu ti luzingu ya beno mpe tike ya beno me futama, ba me ndima beno. Tii kuna kidimbu yina ke kwiza, beno kele ve na muswa na kutambula na bala-bala ya nene, beno kele ve na muswa na . . . na nzila ya bisi; beno kele ve na muswa ya kukota tii beno lenda talisa kidimbu yayi, mpe kidimbu yina kele tike ya beno. Mpe ntangu yayi Yawu ke lakisa ti Menga me basika mpe me tulama na beno, ntalu me futama na beno, mpe beno kele na Kidimbu ti ba me tula Menga na zulu ya beno mpe ba me ndima beno. Beno me bakula yawu ntangu yayi? Oh, la la! Oh!

<sup>18</sup> Ntangu yayi—ntangu yayi, kaka nzikisa ya kieleka ve. Beno me mona? Beno ke tuba, “Mpangi Branham,” mu ke kuwa yawu na mabanza ya nge, beno me mona, “samu na yinki mu ke zaba?”

Beno tala, yinki beno vwandaka, mpe yinki beno kele? Ya kele wapi mutindu beno ke zaba. Beno me mona? Yinki beno vwandaka ntete ba tula Kidimbu yayi? Yinki beno kele na manima ba me tula Yawu? Yinki vwandaka bansatu ya beno na ntwala, mpe yinki kele bansatu ya beno na manima? Na yina beno ke zaba kana Kidimbu me tulama to ve. Mpe bima yayi yankaka ke kwenda kaka na Yawu. Beno me mona?

<sup>19</sup> Ya—ya kele ve mutindu kuzonzila yawu, mpe kutuba, “Bandinga kele nzikisa.” Ntangu yayi, mu ke simbisa, mu ke sumba basapatu, ludimi kele ve sapatu. Ya ke kwizaka kaka na sapatu, beno me mona. Ya ke kwizaka kaka na sapatu. Beno me mona? Ntangu yayi, kima mosi kele Kidimbu. Kidimbu kele Klisto. Kasi kuzonza na bandinga, mpe kubasisa bampeve ya yimbi, mpe kusala bima yina, mpe kulonga, mpe nyonso yina, kele nzikisa ti Ya kele kuna, kieleka, kasi ya kele—ya kele Yawu ve. Beno me mona, ya kele dikabu ya Yawu. Kana mu tuba na beno ti . . .

<sup>20</sup> Beno ke tuba, “Mu—mu zola ti nge, Mpangi Branham,” mpe mu ke pesa nge dikabu, beno me mona. Mbote, ya kele munu ve, ya kele dikabu ya munu.

Bandinga kele dikabu ya Mpeve-Santu, Mpeve-Santu ve; dikabu ya Mpeve-Santu.

<sup>21</sup> Mpe diabulu lenda mekula konso kima yina, kasi yandi lenda vwanda ve Mpeve-Santu. Beno me mona? Yandi lenda mekula makabu yayi, kasi yandi lenda vwanda ve Mpeve-Santu.

Mpe Mpeve-Santu kele Kidimbu ti ba me tula Menga, samu ti Yawu ke landaka Menga ntangu nyonso kubanda na Buku ya Mpulusu. Beno me mona yawu? Yina vwandaka lukanu ya nkwezulu ya Yandi. Ya kele yina Yandi landaka na bansungi nionso. Konso nsungi Yandi landaka yawu, samu na kumona ti Yawu me longama, mpe ba lendaka ve kukuma ya kulunga kukondwa beto. Mpe ntangu yayi Mpeve-Santu ya muvimba ke kwisa tala Dibuundu, ke sala Nzambi na kati ya nzutu ya muntu; mutindu Yandi salaka na ntuala ya Sodome, yina vwandaka pela kuna, yina vwandaka kifwanukusu. Na yina, Abraham, Yandi monikaka na yandi.

<sup>22</sup> Mpe bima nyonso yina Yandi salaka ve na kati ya bansungi, na kati ya bansungi ya dibuundu, Yandi ke na kusalaka yawu ntangu yayi. Beto vutuka na Ndinga, samu ti bansangu mpe bansangu mpe bansangu fwana kusuka na Ndinga ya muvimba. Mpe na bilumbu ya nsuka, Bidimbu Sambwadi zibukaka, ya vwandaka kubaka konso nsinga yina bikanaka na kati ya yawu, mpe kusala kima nyonso na kati ya nzutu mosi ya nene ya Kento ya makwela, ti bayina zingaka na manima kuna vwandaka ve ya kulunga tii Dibuundu yayi ke kuma ya kulunga, nkonga ya Kento ya makwela yayi na bilumbu ya nsuka, samu na kukotisa bawu, mpe bawu nyonso kintwadi ke zanguka. Beno me mona?

<sup>23</sup> Kidimbu, Yesu Klisto, Mpeve-Santu, kele na kati-kati ya beto. Beto fwana zitisa yawu. Beto—beto—beto—beto lenda kukikulumusa mingi ve beto mosi. Na kukatulaka basapatu ya beno, to kufukama, zolaka ve kukatula yawu; ya ke—ya ke sepelisa yawu ve, ya ke pesa beto mvutu ve; kasi luzingu yina ke basisa bambuma ya Mpeve!

<sup>24</sup> Ntangu yayi yinki kele bambuma ya Mpeve? Beno me mona? Zola, kyese, ngemba.

<sup>25</sup> Beno ke bambuka moyo na suka yayi? Kukubama, kufidisa munati-nsangu na Nsangu. Kima yina ke landa Yandi salaka, na manima Yandi fidisaka munati-nsangu na Nsangu, Yandi fidisaka Dikunzi ya Tiya samu na nsiamisa. Kima yina vwandaka landa vwandaka, na manima ya yina, vwandaka kuvukana ya bambwe- . . . to kukatula kyadi. Beno me mona? Beno zabaka ti ya vwandaka kieleka, beno vwandaka na ngemba. Beto kele na ngemba na Nzambi, na nzila ya Mfumu Yesu Klisto. Beno me mona?

<sup>26</sup> Ntangu yayi na nkokila yayi beto ke sambila samu na bambevo, mpe mu banza ti bawu kele na kominyo. Beno—beno ke kuzwa mbotika, kusalu ya mbotika? [Mpangi Neville me tuba, “Ve.”—Mu.] Kaka kominyo, kominyo. Mpe beto zola ti beno bikana samu na kominyo.

<sup>27</sup> Mpe na—na minuti makumi tatu na tanu to makumi yiya beto zola kumanisa mpe kukubama samu na kominyo. Mpe ntangu yayi, mbasi kele kilumbu ya Feti ya Kisalu, na yina beno lendaka

kupema. Ntangu yayi, mu tubaka ti ya vwandaka mabanza ya beto, beno me mona. Beto zaba ve wapi ntangu. Mu zola kieleka kukumisa yawu kieleka.

<sup>28</sup> Ntangu yayi, na suka yayi mu tubaka na beno, ti mu vwandaka ve na beno, mu—mu banza ti beto vwandaka na Nsangu ya bangunga zole- to tatu na suka yayi. Kasi—kasi mu—mu me banda kaka, mpe mu banzaka ti mu ke nata yawu kuna na nkokila yayi, kasi ya vwandaka kaka nene mingi. Mu zaba ve kana bantu me bakula yawu to ve. Mu banza ti bawu me bakula, bisika nyonso. Mpe mu banza ti ya vwandaka na mwa ba-bande mosi ya mbote na zulu ya yawu, na yina ba ke nata yawu, samu na kuzabana, ti mu ke kwikila, na Nsangu nyonso yina mu me longaka ntete, dikunzi yina vwandaka ya kutumama na Nzambi, na ngaanda ya . . . Kieleka, lutumu ya ntangu nyonso, mutindu Bidimbu Sambwadi mpe nyonso, yina vwandaka mbala mosi Ndinga ya Nzambi. Mu ke na kuzonzila Nsangu mosi samu na kulonga; mu ke kwikila ti mosi vwandaka yawu, beno me mona, ti—ti, yandi yina zolaka kulanda Bidimbu Sambwadi yina.

<sup>29</sup> Ntangu yayi beno tala mbote yina ke na kulanda Bidimbu Sambwadi: kuvukana ya bantu, bidimbu ya kuvukana, nsemo ya mbwaki ke na kulezima na bilumbu ya nsuka, kidimbu ya bakento ba ke kuma kitoko mingi, mpe bakala, yina bawu ke sala. Bidimbu nyonso yayi ya Mpeve-Santu yina ke na kutwadisa, na manima beno vutuka awa na nsuka ya Bansangu nyonso yina kubanda Bidimbu Sambwadi. Ya me kangama na kima mosi yayi, Kidimbu, ti beto nyonso kele ya kulunga, beno me mona, beto kukitala kaka beto mosi mpe beno mona kana beto kele na Lukwikilu.

<sup>30</sup> Ntangu yayi, Mfumu sakumuna beno. Mpe ntangu yayi ntete beto—ntete beto baka Biblia, samu na kusambila samu na bambevo . . . Beto me yufula na suka yayi, bantu yikwa ba sambilaka na Lumingu me luta na nkokila, yina—yina—yina belukaka, bawu belukaka yimeni na sabala yayi, mpe na kutala bantu nyonso awa me telemisa diboko ya bawu, yina vwandaka na lukutakanu Lumingu me luta na nkokila. Ntangu yayi, ya kele kima mosi, beno me bakula. Ya kele kima yina kele . . . Ya kele, mu ke na kuzonzila yayi samu na munu mosi.

<sup>31</sup> Ya vwandaka na mwana-bakala mosi ya ntwenia, yina ba tubaka na yandi, yina katukaka na Chicago, Mama mosi ya ntwenya . . . Kento yango, Peckinpaugh, Peck- . . . Mrs. Peckinpaugh na—na . . . Yandi kele mpangi-kento ya Muklisto ya kulutula mbote. Mpe yandi nataka muntu mosi, mwana mosi, mutindu mu me bakula yawu, mwana-bakala ya ntwenya to kima mosi, yina—yina . . . badokotolo zabaka ve yina vwandaka dyambu na yandi. Ba-poumon ya yandi vwandaka yimbi mingi, to kima mosi, ti—ti ba lendaka ve kusala . . . ba lendaka ve kutula yandi na lukolo to kima mosi. Yandi vwandaka kieleka, kieleka yimbi. Mpe yandi tubaka, Mpeve-Santu kaka na manima

ya Nsangu, zonzaka na mwana-bakala yina ya ntwenya, mpe bokilaka yandi, tubaka na yandi bampasi ya yandi mpe nyonso yina, mpe zabisaka kubeluka ya yandi.

Mpe sabala yayi yandi kwendaka, mama to bibuti, to muntu nyonso yina ya vwandaka, ba vutulaka yandi na dokotolo, mpe dokotolo tubaka ti yandi vwandaka na ba-poumon ya malu-malu, beno me mona, ya vwandaka na ba-poumon ya malu-malu. Mpe mutindu mu me bakula, ti—ti bibuti to muntu mosi bokilaka ntama kuna, to na mutindu mosi, samu ti yawu zabana na dibuundu. Beno me mona? Ntangu yayi, Nzambi, Mvangi, lenda sala ba-poumon.

<sup>32</sup> Ya kieleka mu—mu ke kwikila ti beto kele na nsongi ya mosi ya bima ya kulutila nene yina me bulaka ntete ve ntoto kubanda bilumbu ya Mfumu Yesu. Beno me mona? Beno me mona? Kasi ntangu yayi beto lenda zabana kaka mutindu. . . Ya ke vwanda ya kukikulumusisa mingi. Beno me mona? Beno me mona, yina muntu ke bokilaka *ngolo*, Nzambi ke bokilaka “busafu.” Kasi yina muntu ke bokilaka *bulawu*, Nzambi ke bokilaka yawu “ngolo.” Beno me mona? Na yawu ntangu yayi beno tala yawu mbote, beno me mona, ya ke vwanda ya kukikulumusisa mingi ti beno ke kondwa ata fioti ve. . . ti beno ke kondwa yawu kana beno kele ve na Kidimbu kuna samu na kufyongonina yawu, beno me mona. Beno me mona?

<sup>33</sup> Nani zolaka banza ntete ti myongo vwandaka dumuka mutindu mwa bankombo ya babakala, mpe matiti vwandaka bula maboko ya bawu, ntangu profete mosi basikaka na ntoto ya kuyuma; yina ba zonzaka na nzila ya Esaie, bankama kumi na zole. . . to bankama sambwadi mpe kumi na zole ya bamvula na ntwala. Na kizizi ya yandi ya kufuluka na mandefo, mpe ya kulwata mpusu ya dimeme, ata mpe chaire ve samu na kulonga, ba basisaka yandi na ngaanda ya mabuundu nionso, mpe telemaka kuna na kumu ya Jourdain, na kubokaka, “Benoni balula ntima!” Mpe bokilaka bantu nkonga ya “bitupa,” banioka. Kasi ya kele yina Nzambi tubaka, ti ntangu Yandi ke kwiza, “myongo ke dumuka mutindu mwa bankombo ya babakala.” Beno me mona? Bantu ya kukikulumusisa monaka yawu mpe vwandaka na kiese.

<sup>34</sup> Wapi mutindu bawu lendaka bakula ti. . . Mesiya yina ya nene, yina pesamaka na profesi kubanda mbandukulu ya Buku, na Genèse, ti Yandi ke kwiza, Mvulusi? Minkayulu nyonso, mpe baprofete nyonso, mpe nyonso vwandaka talisa na Yandi. Mpe na yina ntangu Yandi kwisaka, ya monanaka ti ya vwandaka mbutukulu ya makangu; tata yina vwandaka ve ya kukwelana na mama ya Yandi, mutindu ya monanaka. Beno me mona? Mpe kento yango kuzwaka kivumu na bébé ntete bawu kwelana. Mpe Yandi me kwiza mutindu yina, mpe butukaka na kati ya mwa. . . Mbote, ya me tuba kidikilu, na kati ya Biblia. Kasi kidikilu na bilumbu ya bawu vwandaka na kati ya mulúku kuna na—



kuna na kati ya kibaka. Mu kutanaka na kisika ya mutindu yina kuna na Arizona kilumbu mosi, na kuzomba. Ya vwandaka na kidikilu na nsi ya kinkuku ya matadi. Mpe ya kele mutindu Yesu butukaka, kuna na kati ya kidikilu yayi ya matadi na zulu ya kidikulu ya matiti mpe nianga, na kati ya kidikilu ya bangombe, beno me mona, kisika kinkuku vwandaka.

<sup>35</sup> Mpe telemaka mutindu Kisadisi ya kisadi-mabaya, mpe wapi mutindu Yina lendaka vwanda Yehowa ya ngolo? Kasi Yawu vwandaka, beno me mona. Yawu vwandaka. Beno me mona? Mutindu ya Muntu ya ngitukulu. Kasi, oh, ntangu Yandi vwandaka kaka Mwana ya bakala, Yandi vwandaka yitukisa banganga-Nzambi na kuzabaka Ndinga yina. Samu na yinki? Yandi vwandaka Ndinga. Beno me mona? Yandi vwandaka Ndinga.

Yandi sonikaka ata fioti ve buku mosi. Yandi sonikaka ata fioti ve—Yandi sonikaka ata fioti ve mpova mosi. Mpova mosi kaka Yandi sonikaka, mu banza, Yandi vwanzaka yawu, na—na zyelo, ntangu ba nataka kento na kindumba. Yandi ata mbala mosi ve sonikaka mpova mosi. Samu na yinki? Yandi vwandaka Ndinga. Beno me mona? Yandi vwandaka Ndinga. Yandi zolaka ve kusonika Yawu; luzingu ya Yandi zingaka Yawu. Yandi vwandaka Ndinga. Kana Yandi . . . “Kana Mu ke sala ve bisalu ya Tata ya Munu, na yina beno kwikila Munu ve.” Beno me mona? “Kana Mu ke sala ve kieleka yina Ndinga tubaka ti Mu ke sala, na yina Mu kele ve Ndinga. Kasi kana . . .” Ya kele yina Yandi zolaka kutuba. Yandi kele Ndinga.

<sup>36</sup> Na yina ntangu yayi beno kubama beno mosi ntangu yayi samu na kisalu ya kubeluka ya nzutu yina ke kwisa mpe kominyo. Beto ke vwanda na kiese samu na beno na kuvwanda na beto kana beno lenda. Kana beno lenda ve, beto ke manisa ntama mingi ve.

<sup>37</sup> Mpe beno zimbana ve, beno sambila samu na munu mpe beno sambila samu na kento ya munu, kento ya lembami mingi na yinza ya muvimba, mpe—mpe samu na bana ya munu. Mpe ntangu yayi mu me lombabawu, bawu nionso, samu na Mfumu Yesu.

<sup>38</sup> Ntangu yayi, Becky kele kaka na nsungi ya mwa Ricketta, beno zaba, mpe kaka ditoko ya kento, mutindu beto vwanda bokilaka yawu. Mpe kuna yandi kele kaka na bamvula yango. Kasi, ntangu yayi, yandi kele mwana-kento mosi ya lembami mingi, mpe mu—mu ke tonda Mfumu samu na yawu; yandi ke kunwaka makaya ve, yandi ke kunwaka malafu ve, kima mosi ve. Kasi yandi kele kaka na nsungi yina, yandi—yandi ke kipaka diambu ve. Yandi ke zolaka ve kukwenda na yinzo-Nzambi, mpe, kana yandi sala yawu, yandi ke vwanda kuna na manima mpe ke tafuna azoka, ke telama mpe ke basika. Ti, beno me mona. Mu zola kumona yandi ya kufuluka na Mpeve-Santu.

<sup>39</sup> Mu zola kumona Joseph, mu zola mwana-bakala yina . . . Mu ke kwikila ti kilumbu mosi ntangu mu lenda dyaka ve kukwenda na chaire, Mu zola kubaka Biblia yayi ya ntama mpe kupesa yawu na yandi, kutuba, “Joseph, bikana na Yawu, mwana.” Na yina mu me kubama na kumata. Mu zola kuwa mupepe kubula kisika mosi kuna, kutala na zulu, kuningisa diboko ya munu, katula kukwenda.

Beto sambila.

<sup>40</sup> Tata Nzambi, luzingu ya beto ya muvimba kele ya kufika na kati ya Yawu, samu ti Yawu kele Nge, mpe Nge kele Luzingu ya beto. Ntangu yayi ya kele na bayankaka awa, Mfumu, yina—yina ke simba Kidimbu yayi yina mu me zonzila. Ba me baka Kidimbu yina, mpe kasi ba kele ya kubela. Mpe mu zola tuba na nokila yayi samu na kupesa bawu kikesa, samu—samu na kupesa bawu kikesa samu na kubaka bamuswa yina Nzambi pesaka. Bawu kele na muswa ya kununga dyabulu yina. Yandi kele yimeni ya kununga, mpe yandi ke na kuvuna kaka bawu. Mu ke na kulomba bawu, Tata.

<sup>41</sup> Ntangu yayi sadisa munu na kuzonza Ndinga. Nge ke zonza na nzila ya munu, Mfumu, na mwa banoti yayi yina mu sonikaka awa, mpe mwa Masonuku yina mu sonikaka. Mu ke sambila ti Nge sadisa munu, Mfumu, mpe kota na Ndinga mpe pesa bawu lukwikilu samu na nkembo ya Nzambi. Na Nkumbu ya Yesu mu ke sambila. Amen.

<sup>42</sup> Ntangu yayi na nswalu, mu zola ti beno zibula Biblia na Buku ya Jérémie mpe kapu 29, kana beno zola kutanga. To, kana ve, beno sonika yawu kaka. Jérémie, kapu 29. Mpe beto ke banda na nzila ya 10 ya Jérémie, nzila ya 10 ya kapu 29. Mpe, beto ke tanga na Luc, kapu ya 16, kubanda na nzila ya 14.

<sup>43</sup> Ntangu yayi mu ke pesa beno dilongi ya munu, na yina beno ke—beno ke—beno ke na kuzibula. Dilongi ya munu kele *Kusuka Ntima*. Mpe munu . . . Kusuka ntima, mpe, ntangu yayi, beno zaba yina kusuka ntima kele.

Mpe ntangu yayi beto ke tanga na Jérémie kapu 29, nzila ya 10.

*Samu mutindu me tuba MFUMU, Ti na manima ya bamvula makumi sambwadi ke lunga na Babylone mu ke kuvisa tala beno, mpe ke lungisa ndinga ya munu ya mbote na ntuala ya beno, na yina beno ke baluka na kisika yayi.*

*Samu ti mu zaba mabanza yina mu ke banza na beno . . . (Ya kele mbote ve?) . . . me tuba MFUMU, ata ti mabanza ya ngemba, mpe ya yimbi ve, samu na kupesa beno nsuka yina me ndimama.*

*Na yina beno ke bokila munu, mpe beno ke kwenda mpe ke sambila munu, mpe mu ke kuwa beno.*

*Mpe beno ke sosa munu, mpe beno ke mona munu, ntangu beno ke sosa munu na ntima ya beno ya muvimba.*

*Mpe ba ke kuzwa munu na nzila ya beno, me tuba MFUMU: mpe mu ke katuka kimpika ya beno, mpe mu ke vukisa beno bisika nyonso . . . na bayinsi, mpe na bisika nyonso kisika mu me nata beno, me tuba MFUMU; mpe . . . ke nata beno dyaka na—na kisika yina mu me sala ti ba nata beno na kukatuka na kimpika. Beno vutuka na pentecote!*

Mu tulaka yawu, munu mosi. Ya ke tuba yawu ve. Ya kele yina mu vwandaka zola kutuba na Dibuundu.

Luc 16, kubanda na nzila ya 15, to na nzila ya 16.

*Musiku mpe bapofete vwandaka tii na Jean: kubanda ntangu yina kimumu ya Nzambi ke longama, mpe muntu nyonso ke kota na yawu.*

“Muntu nionso ke kota na kati ya Yawu.” Ve kaka kukota na kati ya Yawu, na malembe, kasi Yawu fwana kukota na kati ya yawu. Beno me mona? Ntangu yayi, “Ntangu beno ke sosa Munu na ntima ya beno ya muvimba, na yina beno ke kuzwa munu.”

<sup>44</sup> Mpe Yandi silaka ti Yandi ke vutuka mpe ke nata bantu, yina mwanganaka bisika nyonso na zulu ya ntoto, na manima ya bamvula makumi sambwadi yina, ke vutuka kuna na Jérusalem kisika bawu katukaka; mpe Yandi salaka yawu kaka mutindu yina. Ya kieleka.

<sup>45</sup> Ntangu yayi beto ke zonzila na—na zulu ya *Kusuka Ntima* samu na baminuti fyoti ntangu yayi. Na mumesanu, ya ke lombaka diambu ya nswalu, samu na kulosa beto na kusuka ntima. Beno me mona? Ya kele mpasi mingi ti ya fwana sala yawu, kasi bantu kele ya kulemba mingi na mabanza ya bawu, ti ya ke lombaka kima ya nswalu. Kima mosi ke telema, mpe ntangu bawu ke sala yawu, na yina ya—ya ke losa bawu na kati ya kusuka ntima yina. Mpe kieleka, na kusalaka yina na kati ya kusuka ntima, ya ke basisa beno na ngaanda ya kima yina ya kieleka yina beno kele. Ya ke talisa yina ba me salaka beno, na ntangu ya kusuka ntima. Ya ke bendaka ntangu nionso bima ya mbote yina kele na kati ya beno.

<sup>46</sup> Na ntangu ya lufwa, mu kuwaka bantu ntangu bawu zabaka ti bawu vwanza kufwa, bima yina bawu bumbaka na kinsweki luzingu ya bawu nionso, bawu, na kati ya kusuka ntima, bawu vwanza meka na kufunguna yawu. Beno me mona? Mpe na kumekaka, “Baka yayi mpe sungika yawu; kwenda, na lemvo ya nge; kwenda, sala,” beno me mona, na kati ya kusuka ntima. Ba zolaka sala yawu ntete, beno me mona, kuvingila ve tii na ntangu ya nswalu. “Nge ke sala yayi-mpe-yayi samu na munu?” Diambu ya nswalu ke nataka kusuka ntima. Na ntangu, beto fwana sala yawu kukondwa diambu ya nswalu.

47 Ntangu yayi beto ke tala, na nkokila yayi, ti beto ke na kubaka bidimbu ya Paki. Mpe ba bakaka Paki na nswalu, na bantangu ya kusuka ntima. Beno tala na—na Exode kapu 12, mpe nzila ya 11 ya kapu 12, mu banza ya kele, ya ke tuba, “Kudya Paki yayi na basapatu na makulu ya nge, na luketo ya nge ya kukanga na zulu, mpe na nkawa na diboko ya nge,” beno me mona, beno ke na kudia yawu na kati ya kusuka ntima.

48 Ba monaka diboko ya nene ya Nzambi. Bawu monaka bimangu ya Yandi nionso, mpe na manima bawu kwisaka na nsi ya kidimbu ya Kidimbu. Mpe na yina bawu vwandaka na nsi ya kidimbu ya Kidimbu, ba me baka kominyo na—na kati ya kusuka ntima, samu bawu zabaka na ntangu yina Nzambi vwandaka kubama na kubula na lufundusu.

49 Mpe ya vwandaka ntangu ya kuningana. Ya vwandaka ntangu yina muntu nyonso vwandaka talana yandi mosi, samu ti Ndinga ya profete kubwaka ata mbala mosi ve. Ya me siamisama ti ya kele kieleka. Nyonso yina yandi tubaka, ya me salama kaka kieleka mutindu yandi tubaka yawu. Dikunzi ya Tiya vwandaka kaka kuna. Mpe, na yina, profete samunaka ti Nzambi ke luta kaka na zulu ntangu Yandi monaka kidimbu na kielo. Mpe ya vwandaka kusuka ntima.

50 Mu ke banza ti bana vwandaka. . .ntangu bawu monaka mapapu yina ya nene, ya ndombe kubwa na zulu mutindu mulinga yina ke vwanda na zulu ya mbanza, kuboka vwandaka katuka na konso yinzo, bana zolaka kwenda na papa ya bawu mpe kutuba, “Papa, nge ke kwikila ti beto kele na nsi ya kidimbu yina?”

Mpe yandi lendaka kwenda na kielo, kutala na zulu ya dikunzi, lainton, ke tuba, “Mwana, yina kele landila Ndinga ya Yandi.”

“Bambuka moyo, mu kele mwana ya nge ya bakala ya kuluntu. Papa, nge ke tuba ya kieleka?”

51 “Mu kele kieleka! Ya kele landila yina profete tubaka na beto, mpe yandi kele na Ndinga ya Mfumu. Yandi tubaka, ‘Ntangu mu ke mona menga, mu ke luta na zulu ya beno. Beno baka mwana-dimeme samu na yinzo.’ Mu me kotisa beno nionso na kati. Nge kele mwana ya munu ya kuluntu, kasi mwana ya munu ya ntete. Ya kele yandi yina ke na kufwa nyonso na kati kuna; kasi menga kele *kuna*. Ya kele yina vwandaka MUTINDU ME TUBA MFUMU. Na yawu pema, mwana ya munu ya bakala, pema na ngemba, samu ti Nzambi salaka nsilulu. Beno me mona?”

“Mbote, Papa, samu na yinki nge me lwata basapatu ya nge? Samu na yinki nge me simba nkawa na diboko ya nge? Samu na yinki nge kele na kitini ya dimpa na diboko mosi mpe mwana-dimeme na diboko yina yankaka? Samu na yinki matiti yayi ya

ndudi mpe nionso yina? Samu na yinki nge ke na kudya yawu? Samu na yinki mutoki ke na kubasika na kizizi ya nge?”

“Mwana, lufwa ke zola kubula.” Beno me mona, ya vwandaka na ntangu ya kusuka ntima.

<sup>52</sup> Ntangu yayi, mu ke kwikila ti beto ke na kuzinga na bilumbu yina beto kele. . . To, na mutindu yankaka, bilumbu yina beto ke na kuzinga lendaka sala ti Dibuundu kukota ya muvimba na kusuka ntima. Mu ke kwikila, kubanda nsangu ya suka yayi yina me katuka na Nzambi, munu ve, mu ke kwikila ti ya fwana losa dibuundu yayi nyonso na kati ya kusuka ntima, ti beto me sakana ntangu ya yinda. Beto ke kwendaka na yinzo-Nzambi ntangu ya yinda. Beto fwana sala kima mosi.

<sup>53</sup> Wapi mutindu ti beto lenda mona bidimbu yankaka ya nene mpe mambu ya ngitukulu kusalama na zulu ya bantu yankaka, mpe wapi mutindu samu na beto? Ya zolaka nata ntangu ya kusuka ntima, ti beto me baka lukanu, na ntwala ya Nzambi. Bidimbu ya Nkwizulu ya Yandi fwana nata dibuundu yayi ya muvimba, ntangu beto me tanga yawu na Ndinga. . . Mpeve-Santu me tuba na beto, “Kwenda na kisika yayi, kima *yayi-mpe-yina* ke salama,” kukondwa kutuba na beto yina ya vwandaka, kasi ya ke salama. Beto ke kwenda kuna, ya ke salama mutindu yina. Bazulunale me baka yawu, bamagazine me baka yawu, me talisa foto ya yawu. Beno vutuka awa mpe beno mona mansweki yina ya nene, yina bumbamaka na kati ya Biblia, yina me zibuka samu na beto, na kilanga ya malu-malu yina beto me zabaka ata fioti ve na ntwala, mpe ya ke wisana na mutindu ya kulunga na Nkwizulu ya Mfumu Yesu.

<sup>54</sup> Na yina, na nsuka ya Bansangu, kumona kisalu ya Mpeve-Santu ya nene, kumona Yandi ke kulumuka pwelele na ntwala ya bantu, mpe ke baka bafoto ya Yawu. Beno me mona Yawu kusala mpe kulakisa ti ya kele ve muntu, ya kele ve kaka mulongi, ya kele ve dibuundu mosi. Ya kele Mpeve-Santu yina ke na kutalisa kima mutindu mosi Yawu salaka ntangu ba tulaka Yawu na nzutu ya Yesu Klisto. Ntangu yayi ba me kotisa Yawu na kati ya Nzutu ya Kento ya Yandi ya makwela. Ya zolaka kotisa beto na kusuka ntima.

<sup>55</sup> Bantu yina monaka diboko ya Nzambi. Mpe na nkokila yina ya kominyo, bawu bakaka yawu na. . . na kati ya kusuka ntima, samu bawu zabaka ti kima mosi zolaka salama. Mpe beto zaba ti kima mosi zola salama. Mpe beno bambuka moyo, Nkwizulu ya Mfumu ke vwanda na kintulumukina, kukwenda ya kinsweki. Yandi ke kwiza mpe ke baka Yandi mutindu muyibi na kati ya mpimpa. Mpe kubanza ti kana muntu mosi, na kintulumukina, ya kele na bamambele ya dibuta ya beto yina me kwenda, mpe beno me bikana na manima! Ya zolaka losa beto na kati ya kusuka ntima, ti, na lemvo ya Nzambi, beto ke bikana ve na

manima. “Kana ya kele na kima mosi mu zola ve. . .Kubika munu ve, bika munu ve, Mfumu.”

<sup>56</sup> Bilumbu fyoti me luta mu vwanda kuwa Mel Johnson kuyimba nkunga yina:

Bambuka moyo na munu ntangu masa ya meso  
ke kulumuka, yinga  
Bambuka moyo na munu ntangu bankundi  
kele ve pene-pene  
Mpe ntangu mu ke zabuka nzadi yayi ya  
Jourdain  
Ntangu Nge ke bokila liste, bambuka moyo na  
munu.

<sup>57</sup> Mpe na Buku ya Luzingu ya Mwana-dimeme, mu zola sonika nkumbu ya munu. Mu zola ti Yandi bambuka moyo na munu ntangu ba ke baka liste. Mpe ya ke kotisa munu na kusuka ntima, ya kele, mutindu Paul tubaka, “Na manima mu me longa Nsangu ya mbote mu ke vwanda kizieti ya muyibi, mu ke vwanda nkimpwaka?” Ya lendaka salama. Na yina ya ke losa munu na kitezo ya kusuka ntima, na kusuka ntima, na kubanza, na manima ya bamvula nyonso yayi ya kulonga, mu ke—mu lendaka. . .ya ke kwisa kisika yina mu ke manga Yandi? Yinki kele ksalu yina ke landa? Yinki mu fwana sala na manima? Mpe ya ke kotisa munu na kitezo ya kidi-kidi. Mpe yinki mu lenda sala? Ya ke losa munu na myongo mpe na biwanda. Mpe ya kele mpsi, samu, ntangu mu kele na bantu, mu fwana vwanda nyonso samu na bantu nyonso, ti mu lendaka nunga bayankaka samu na Klisto, kasi na Kidimbu yina ntangu nionso na ntwala ya munu. Beno me mona?

<sup>58</sup> Mpe mu ke mona bima yina ke salama, mpe beno lenda ve kutuba na bantu. Beno ke mona bima ya mutindu na mutindu, mpe ba me pekisa beno. Ba-vision yina ba ke bokilaka, mpe bantangu yankaka ba ke lemvokila beno kana beno me tuba na bawu, mpe beno zaba ya kulutila mbote na kusala yawu. Mpe kuna beno ke kwenda ntama mingi na ba-vision tii nyonso ke kuma vision mosi, mpe ya ke kotisa beno na kitezo ya kidi-kidi. Beno—beno ke tala mpe ke tuba, “Ntangu yayi mu kele na kati ya vision?” Mutindu kuvwanda kaka awa, “Yayi kele vision? Wapi kisika mu kele kieleka ya kutelama?” Beno me mona, beno—beno ke sala ksalu mingi, beno ke sala kulutila mingi. Mpe beno ke mona bima samu na bantu yina beno zolaka ve kuzaba. Bantu yina ke vwandaka na nsatu ya bima yayi, samu na kuzaba bima yayi, ba ke bakulaka ve wapi mutindu ya ministele yina ke lombaka. Beno zaba ve yina ke kwendaka na yawu. Na manima yawu ke kotisa beno na kati ya kusuka ntima, “Mfumu Nzambi, mu zaba ti mu ke pesa mvutu.”

<sup>59</sup> Jack Moore tubaka na munu kilumbu mosi, “Mu ke zola ve kupesa mvutu mutindu nge fwana kupesa mvutu, na Kilumbu

ya Lufundusu.” Yandi tubaka, “Nzambi me tula bantu yayi na maboko ya nge, mpe nge ke pesa mvutu samu na mosi na mosi ya bawu. Nge ke pesa mvutu samu na ministele ya nge.” Ya me luta pene ya bamvula kumi na tanu, to mu banza kumi na nana. Mpe kubanda ntangu yina, mu me vwandaka na kati ya kusuka ntima. Yinki mu ke sala?

“Bika mu tuba kaka yina Nge ke tuba, Mfumu. Bika mu tuba na bawu yina kele Kieleka, to mu ke tuba kima mosi ve.” Ya ke kotisa munu na kati ya kusuka ntima.

<sup>60</sup> Na yina na kumonaka bidimbu yayi kukwiza, na kumonaka Mpeve-Santu kukatula beto kuna, mpe kunata Bidimbu yayi, mpe kutula yawu mutindu yina. Kunata Bansungi ya Dibuundu mpe kutula yawu kuna na kati, na manima kulumukaka na Dikunzi ya nene ya Tiya na manima kuna, mpe—mpe monisamaka Yandi mosi. Na manima me kulumuka na zulu ya kima yina ke landa, na zulu ya Bidimbu Sambwadi, mpe me monisa yawu. Ba me tula yawu mpe na bazulunale mpe bamagazine. Na manima kwizaka mpe bakaka bawanzio ya Nzambi, bawanzio sambwadi yayi na Bansangu sambwadi, mpe me siamisa yawu kieleka yina Biblia me tuba. Na yina, na kati ya ntangu yina, kwisaka mpe nataka Bidimbu yina . . . bidimbu yina, minzenzi ya ntangu ya nsuka, mpe kunata yawu na bantu mpe kutuba na bawu yinki ya kele, mpe nyonso yina me tala yawu, mpe Mfumu na kusalaka kaka kuna na kulakisaka ti Yandi kele awa. Mpe kuna, kaka mutindu na suka yayi, me kwiza mpe me lomba ti Kidimbu yina kuvwanda na zulu ya muntu nyonso. Na yina, beno kele bantu ya munu. Beno kele bayina mu ke zolaka, bayayi mpe bayina ke na kuwa ba-bande, mpe nyonso yina. Beno me mona wapi kusuka ntima ya ke kotisa munu.

<sup>61</sup> Kusuka ntima. Bidimbu ya Nkwizulu ya Yandi lendaka losa konso mambele ya Klisto na kati ya kusuka ntima ntangu yayi, samu na myoyo ya beto, samu na bumbote ya beto—beto—beto samu na simu yina yankaka. Mbote, yinki beto ke kuzwa kana beto kuzwa yinza ya muvimba? Yinki beto kele, samu na yinki beto ke na kuzinga? Samu na yinki beno ke sala? Samu na yinki beno ke na kudia? Samu na yinki beno ke na kunwana? Samu na kuzinga. Samu na yinki beno ke na kuzinga? Samu na kufwa. Mpe beno kele ve ya kulunga samu na kuzinga tii beno me kubama na kufwa. Ya kele kieleka.

<sup>62</sup> Mpe beto ke mona bimangu mingi ya kubeluka ya nzutu, ya ke sala ti beto sukaka ntima.

<sup>63</sup> Kana mwana-bakala yina ya ntwenya . . . Mu ke na kumona Mama Peckinpaugh ntangu yayi? Yayi kele Mama Peckinpaugh? Nge kele yandi yina vwandaka na mwana ya bakala awa, kima mosi to yankaka? Oh, kento yayi kele ya kuvwanda kaka awa yina mu vwandaka zonzila. Mu me tala kaka kuna mpe kumona yandi.

64 Ntangu yayi kana Nzambi lenda sala yawu samu na mwana-bakala yina ya fioti, ya fwana nata beno na kusuka ntima.

65 Bakala mosi ya New Albany, yandi lendaka vwanda awa na nkokila yayi. Yandi kele nkundi ya Mpangi ya munu Roberson. Yandi vwandaka na mwana-bakala ya fioti awa. Mu banza ti kento ya yandi vwandaka na cancer kilumbu mosi mpe yandi belukaka. Mpe—mpe ntangu yayi, mwana-bakala ya ntwenya vwandaka na asthma ya kulutila mingi ti yandi kele kaka na mavimpi ya yimbi. Muntu yayi ya fioti, vwandaka kaka na cancer ya laka, yandi mosi. Beno me mona? Mpe na manima yandi nataka mwana-bakala yina ya fioti, yinga, mu ke mona diboko ya yandi na zulu na manima, kuna na manima, ba sambilaka samu na yandi na suka yayi, beno me mona.

66 Kusuka ntima! Ntangu kento yina zolaka kufwa na cancer, yandi zabaka ti Nzambi lendaka belusa yandi. Mpe kana Nzambi lendaka belusa kento ya yandi, Nzambi lendaka belusa mwana-bakala yayi. Mpe ya ke kotisa yawu na kisika ya kusuka ntima. Beno me mona? Beno fwana kwiza; mpe ntangu beno ke suka ntima, kuna Nzambi ke kuwa beno. Kasi kana beno kele kaka ya kulemba, beno ke kipe ve kana Yandi ke sala to ve, mbote, na yina ya kele mutindu yankaka. Beno ke tuba ti beno ke sala yawu, kasi ya ke lomba kusuka ntima na kusala yawu.

67 Mu ke kwikila ti ya kele samu na yina beto kele ve na kusuka ntima samu ti ya kele kukondwa ya zola, Nzambi, zola ya Nzambi. Mu banza ti zola ya Nzambi ke nataka kusuka ntima. Kana Nzambi kele na kati ya beno, Kidimbu na kati ya beno, mpe beno ke mona mitindu ya bantangu, mpe bantu ke tambula na kati ya disumu mutindu ba kele, ya ke losa beno na kati ya kusuka ntima. Mu ke kwikila ti ya ke vwanda mutindu yina.

68 Ntangu yayi Ndinga ke tuba pwelele, kana beno zola kusonika yayi, na Galates 5:6, ti, “Lukwikilu ke salaka na nzila ya zola.” Beno me mona? “Lukwikilu ke salaka na nzila ya zola.” Mpe mutindu kaka yina beno lenda kuzwa lukwikilu, kele kuvwanda na zola ntete. Samu ti, na manima ya nyonso, lukwikilu kele nkindusulu ya zola. Nkindusulu, ya kele kieleka yina—yina lukwikilu kele. Ya kele nkindusulu ya zola. Ntangu yayi, beno, kana beno kele ve na zola, beno lenda vwanda ve na lukwikilu. Beno me mona?

69 Wapi mutindu beno lenda vwanda na lukwikilu na kento ya beno kana beno zola yandi ve? Ya kele na *phileo*. Ntangu yayi wapi mutindu samu na agapao, samu na Nzambi? Wapi mutindu ya lenda vwanda kana beno zola Nzambi ve?

Kana beno me tuba ti beno ke zolaka kento ya beno, mpe beno me tubaka na yandi ata fioti ve samu na yawu, mpe beno me vwandaka ata fioti ve mpe kusala zola na yandi, kutuba yawu na yandi, kubeze yandi, kupesa yandi beze ya mbote, mpe kutuba na yandi ti yandi kele mulambi ya kulutila mbote na yinsi, bima



nyonso yina beno zaba, mpe wapi mutindu yandi kele kitoko, mpe mutindu beno zola yandi; kana beno sala yawu ve, yandi ke zaba yawu ata fioti ve. Ya kele mutindu yina. Kana beno zola yandi, beno lakisa yawu.

<sup>70</sup> Ya kele mutindu mosi beto ke salaka na Nzambi. Ntangu beto ke zolaka Yandi, beto ke tubila yawu na Yandi. Beto ke vwanda mpe beto ke kembila Yandi, mpe beto ke sambila Yandi. Mpe, beno me mona, zola ke nakata beto na yawu.

<sup>71</sup> Ntangu yayi yinki ke salama kana kima mosi fwana salama samu na kento ya beno? Samu na yinki, yawu ke losa beno na kati ya kusuka ntima na kusala yawu. Yinki kana muntu mosi kutuba ti kento ya beno kele na cancer? Yinki ke salama kana muntu mosi kutuba ti kento ya beno—ya beno kele na tuberculose, mpe yandi ke zola kufwa? Kasi, beno, beno ke—beno ke sala nyonso. Beno me mona, ya ke losa beno na kati ya kusuka ntima.

<sup>72</sup> Mpe ya kele kima mutindu mosi yina kele. Beto fwana vwanda na zola ntete beto kuzwa lukwikilu. Mpe lukwikilu . . . Ntangu beto kele na zola ya kieleka, yinki yawu ke sala? Yawu ke basisa lukwikilu ya beto na ndilu ya bitumba samu na Nzambi. Beno me mona? Zola ya kieleka ya kinzambi samu na Nzambi mpe samu na Ndinga ya Yandi mpe samu na bantu ya Yandi, ke basisa lukwikilu kuna. Zola ke baka kaka lukwikilu, mpe kaka, “Kwiza, beto kwenda!” Mpe ya ke basika, samu ti ya kele yina zola ke salaka.

<sup>73</sup> Jean 14:23, Yesu tubaka, “Kana muntu zola Munu, yandi ke zitisa Bandinga ya Munu.” Ntangu yayi beno lenda ve kuzitisa Bandinga ya Yandi kukondwa kuvwanda na lukwikilu na yina Yandi tubaka. Na yawu, beno me mona, kana yandi zola Nzambi, na yina yandi ke zitisaka Ndinga ya Nzambi. Kana Yandi tubaka, “Mu kele Mfumu yina me belusa nge,” yandi ke kwikila yawu. Zola ke sala yandi kukwikila yawu, samu zola me yala nyonso. “Ata ti mu zonza na bandinga ya bantu mpe ya Bawanzio, mu ke na zola ve, ya kele mpamba, beno me mona. Ata ti mu kele na lukwikilu ya kukatula myongo, mpe mu kele na zola ve, ya kele mpamba.” Zola ke yalaka nyonso, samu ti Nzambi kele zola, Nzambi ya zola. Ntangu yayi, yinga, tata! Kana Yesu tubaka, “Kana muntu zola Munu, yandi ke zitisa Bandinga ya Munu.”

<sup>74</sup> Beto zaba ti ya kele kieleka ti Nzambi ke kutana na moyo yina me suka ntima. Ntangu yayi, beto nyonso zaba yawu. Kasi ya ke lombaka ntangu nionso kima mosi samu na kunata beto na kati ya yawu, na kati ya kusuka ntima yina, tii na kusuka ntima. Ya ke lombaka kima mosi samu na kusala yawu.

<sup>75</sup> Beto ke mona, na Jacques 5:15, ti Biblia ke tuba, ti, “Kisambu ya lukwikilu,” ya kele kusuka ntima, “kisambu ya lukwikilu ya muntu ya kudedama kele na ngolo mingi. Ntangu muntu ya kudedama, muntu ya mbote, ke kota na kisalu,” to nzietolo ya moyo, to kisalu, mosi to yankaka. Mu—mu banza “nzietolo” kele

mpova ya kulutila mbote. Kisalu, to nzietolo, to yina beno zola kubokila yawu. Kasi ntangu moyo ke kota—na kati ya kusuka ntima, na kisalu, kisambu ya lukwikilu ya muntu yina lenda lakisa Kidimbu, ya ke sala kima mosi. Beno me mona?

<sup>76</sup> Beno tala yina Biblia me tuba awa dyaka, na Jacques 16, 5:16, ya me tuba, kana . . . “Kufunguna bafoti ya beto,” kusungama, kukubamaka samu na yawu, “beto funguna bafoti ya beto mosi na yankaka.” Kukondwa—kukondwa bafoti . . . Beno lomba bantu na kusambila samu na beno, na kufungunaka bafoti ya beto na mosi na yankaka, mpe na kusambilaka samu na mosi na yankaka. Beno bawu yayi. Na zola, zola, ti mu ke na kivuvu ti mu lenda funguna na beno yimbi ya munu; mpe beno lenda funguna na munu yimbi ya beno. Mpe mu zola beno kulutila mingi ti mu ke sambila samu na beno, mpe beno ke sambila samu na munu; mpe beto ke kangama na yawu, na kisambu ya kieleka ya lukwikilu, tii ya ke kuzwa mvutu. Ya kele, yina kele kusuka ntima. Ya kele yina beto fwana kuzwa ntangu nyonso.

<sup>77</sup> Beto baka mwa bambandu ya Masonuku samu na yawu, yinki salamaka, ntangu yayi, samu na yankaka, pene ya baminuti kumi na tanu, kana Mfumu zola.

<sup>78</sup> Jacob, yandi vwandaka muntu, yandi vwandaka ntete mwa . . . mutindu mwana ya bakala yina vwandaka kipe diambu ve. Yandi banzaka na dibanza ya yandi mosi ti yandi zabaka ti bukuluntu zola kutuba nyonso samu na yandi, mpe yandi vwanaka kipe ve mutindu yandi zolaka kuzwa yawu, kaka yandi kuzwaka yawu. Mpe na manima yandi me kuzwa yawu, yandi banzaka ti nyonso vwandaka mbote, samu ti yandi vwandaka na bukuluntu. Yandi banzaka ti diambu yango me suka. Yandi kwisaka na mpangi ya yandi ya bakala ntangu yandi vwandaka na nzala, yandi katukaka na kilanga, na kisalu ya bibulu mpe kuzomba mbambi. Mpe mpangi ya yandi ya bakala, yandi—yandi vwanaka na nsatu ya kinkuku ya nene ya madesu, madesu ya nseke mpe—mpe nionso yina kintwadi. Ya lendaka vwanaka kieleka ya kumekama ntangu muntu kele na nzala, na manima ya kutambula kilumbu ya muvimba. Mpe mpangi ya yandi ya bakala tubaka, “Mu ke zola kukangama pema. Pesa munu mwa ndambu ya yayi.”

Mpe yandi tubaka, “Mbote, mu . . . kana nge ke zenga ndefi na munu ti mu ke kuzwa bukuluntu.” Beno me mona? Yandi kipaka ve mutindu yandi salaka yawu, kaka yandi kuzwaka yawu. Mpe yandi banzaka, ntangu yandi ke kuzwa bukuluntu, yina sukisaka yawu.

<sup>79</sup> Pentecote, ya kele kisika yina beno kubwaka! Beno banzaka samu ti beno me butuka na Mpeve, beno me butuka na Mpeve ya Nzambi, Bukuluntu, yina sukisaka yawu. Kasi ya bandaka kaka yawu. Beno ke bambuka moyo na nsangu ya—ya *Beno Kuwa Yandi*, wapi mutindu ti mwana, na manima yandi me

butuka na dibuta, me kuma mwana. Yandi vwandaka na muswa ya bukuluntu, kasi ya zolaka siamisama, mwana yina ba me longusa. Mpe na yina kana ya me talisa ve ti yandi kele mwana ya kutumama na luzolo ya tata, na yina ya fwana vwanda, mbote, ya ke kuzwa ve. . . ya vwandaka ve. . . kumaka kilandi. Yandi kuzwaka ve difwa, kasi yandi vwandaka mwana ya bakala, kasi yandi kuzwaka difwa ve kana yandi vwandaka sepela ve na kisalu ya tata.

<sup>80</sup> Mpe na yawu ntangu Mpeve-Santu kulumukaka na zulu ya bantu ya Pentecote mpe bawu bandaka na kuvutula makabu mpe bima yina vwandaka na kati ya dibuundu; bawu banzaka, samu ti bawu butukaka na Mpeve, yina sukisaka yawu. Kasi, beno me mona, ya kele na kisika ya mwana. Mpe na manima mwana yayi me siamisama ti yandi kele mwana ya kieleka, na yina ba nataka yandi na kisika ya bantu nionso, mpe ba tulaka yandi na zulu, mpe vwandaka soba ba-robe, mpe yandi vwandaka kuna; mpe na manima ya vwandaka na kisika ya mwana, ti yandi vwandaka kilandi ya bima nionso tata kuzwaka.

<sup>81</sup> Nzambi salaka kima mutindu mosi na nzila ya Mwana ya Yandi na zulu ya Mongo ya Nsobolo. Yandi fikaka yandi na kivudi na. . . to dituti, mpe Yandi sobaka, mpe bilele ya Yandi vwandaka sema mutindu mwini, mpe ndinga mosi tubaka, “Yayi kele Mwana ya Munu ya Luzolo na Yandi Mu me sepela mingi.” Moise mpe musiku kubwaka. Mpe yayi kele Yandi, “Beno kuwa Yandi.” Ba tulaka Yandi na kisika. Beno me mona?

<sup>82</sup> Ntangu yayi Jacob banzaka, samu ti yandi vwandaka na bukuluntu, ti nyonso vwandaka me salama.

Mutindu mosi salaka bantu ya Pentecote, mpe bawu bandaka na kusala organisation, ba-unitaire, ba-trinitaire, mpe ba-trinitairien, mpe ba-organisation ya mutindu na mutindu, mpe ba vwandaka swana mpe vwandaka bendana mosi na yankaka, ya vwandaka talisa ti Kidimbu vwandaka talisama ve. Mayele ya yimbi, musoki, kuswana, beno me mona, kasi ya kele kisika yina ya fwana vwanda.

<sup>83</sup> Ntangu yayi, beno me mona, Jacob banzaka mutindu mosi. Kasi na kati ya boma, ya kento ya yandi mosi, na mpimpa mosi, kusuka ntima simbaka yandi, ntangu yandi banzaka ti, “Kuna na simu yina ya nzadi, mpangi ya munu ya bakala ke na kulingila na kufwa munu. Yandi kwendaka kuna.” Beno me mona, bukuluntu yina yandi kuzwaka, vwandaka kima yina zolaka nata lufwa ya yandi.

Mpe bantangu yankaka kima yina kaka beno ke kuzwa, mutindu Mpeve-Santu, Ya kele, mpe me butuka dyaka na Mpeve, kana beno sala keba ve, kima ya mutindu mosi ke fundisa beno na nsuka. Ya kele kieleka. Bamasa yina kaka vulusaka Noé, fundisaka yinza. Kima yina—yina beno ke bokila bufanatiki

lendaka vwanda kima yina kaka ke fundisa beno na nsuka ya nzila.

<sup>84</sup> Ntangu yayi Jacob zabaka ti luzingu ya yandi vwandaka pene-pene na nsuka. Yandi vwandaka na munati-nsangu yina kwisaka tuba na yandi ti mpangi ya yandi ya bakala, na babakala nkama yiya ya basoda, vwandaka kwisa kutana na yandi, yandi zabaka ti yandi vwandaka—yandi vwandaka na nzila ya yandi. Boma simbaka yandi. Yandi fidisaka muntu kuna na bangombe, mpe bibulu, mpe mameme samu na kupesa dikabu ya ngemba na Ésaü. Na yina, na manima ya yina, yandi bandaka kimvuka yankaka na kinkuku yankaka ya bima. Na manima yandi bandaka kimvuka yankaka na kinkuku yankaka ya bima, na kumekaka na kukutana na yandi ntete, samu na kumeka na kulembika nganzi ya yandi. Na yina yandi bandaka na kubanza, “Yina ke kanga yandi ve, samu ti yandi kele kaka mvwama mingi kulutula munu. Yandi kele na nsatu ya yawu ve.” Na manima yandi bakaka bakento ya yandi mpe bana ya yandi ya fioti, mpe fidisaka bawu kuna, ti Esaü ke mona bana ya fyoti yayi mpe bakento ya yandi. Mpe ya kieleka samu na bana-nkasi ya yandi ya babakala mpe ya bakento, yandi ke kufwa bawu ve. Na yina, yandi, kasi yandi lendaka ve kusala yawu. Nzambi zaba wapi mutindu kuzwa muntu. Jacob zabukaka mwa masa yina. Yandi fukamaka kuna.

Beno zaba, yandi vwandaka mutindu ya mwa muntu ya luvunu, na ntwala ya yina. Beno lemvočila munu samu na nzonzolo yayi, kasi mutindu ya mwa . . . Yandi vwandaka Jacob. *Jacob* zola kutuba “muntu ya luvunu,” mpe ya kele yina yandi vwandaka. Kasi ya kele na kima mosi zolaka salama na yandi. Kuna na kati ya kusuka ntima, kuna ntangu lufwa vwandaka na ntwala ya yandi. . .

<sup>85</sup> Ya lendaka vwanda na babakala mpe bakento yina kele ya kuvwanda awa na nkokila yayi, ya kele, lufwa kele kaka na ntwala ya beno. Mpe mutindu mosi kaka yina beno lendaka vwanda na kiyeka ya kulungisa kima yina beno zola, kele ntangu kusuka ntima ke kwisaka. “Mu fwana kuzwa yawu, na nkokila yayi. Mu ke kuzwa yawu ntangu yayi, to mu me suka. Mbasi ke vwanda ntangu me luta mingi. Mu fwana kuzwa yawu ntangu yayi!”

Ntangu beno ke sambila samu na mbotika ya Mpeve-Santu, Kidimbu, beno tuba ve, “Mbote, ntangu yayi mu ke kwenda kuna mpe mu ke meka. Mfumu, munu, mu kele ya kulemba fioti.” Oh, kyadi, beno bikana na kiti ya beno! Ti beno meka ve. Kana beno kwiza, beno tuba, “Mu ke luta na ndonga ya bisambu; beno tula mafuta na yintu ya munu, mu ke tala kana ya ke sala munu mbote,” ya lendaka vwanda na kuvwanda kisika beno kele. Tii ntangu beno ke kuma na kisika yina, tii dibuundu ya muvimba ke kuma na kisika mosi, ti ya kele na kati-kati ya lufwa mpe luzingu, beno fwana kuzwa Yawu ntangu yayi to beno ke kufwa,

kuna Nzambi ke kota na kisalulu. Ya ke lomba kusuka ntima samu na kukotisa Nzambi na kisalulu.

<sup>86</sup> Jacob bokaka mutindu yandi me dilaka ntete ve. Na kati ya kusuka ntima yandi bokilaka tii kuna yandi simbaka Nzambi. Mpe ntangu yandi salaka mutindu yina, yandi nwanaka; samu na baminuti kumi na tanu ve. Yandi nwanaka samu na kukanga Yandi, na kati ya moyo ya yandi, mpimpa ya muvimba; mpe dyaka yandi zabaka ti yandi kuzwaka ve lusakumunu, mpe yandi vwandaka na lenda ya kusimba tii lusakumunu ke kwiza. Yandi nwanaka tii lusakumunu kwisaka. Na yina, mpe ntangu yandi monaka . . . tii kuna Nzambi kotaka na kisalulu. Mpe kuna, na kati ya kusuka ntima, “Mu ke bika ve Nge kwenda,” ntangu yandi bandaka na kuwa lusakumunu kukulumuka na zulu ya yandi.

Bantu mingi ke tubaka, “Nkembo na Nzambi, mu me kuzwa yawu ntangu yayi.” Kele kisika yina ba me vuna beno. Yinga! Muntu mosi ke tuba, “Oh, mu ke na kuwa kaka mbote mingi, Mpangi Branham, mu kwendaka kuna mpe sambilaka. Oh, madidi me simba munu.” Mpe ya lendaka vwanda Nzambi. “Mu monaka nsemo ya nene na ntuala ya munu.” Ya lendaka vwanda kaka Nzambi, kasi ya kele ve yina mu ke na kuzonzila.

<sup>87</sup> Biblia ke tuba, na Hébreux kapu ya 6, “Mvula ke kubwaka na zulu ya muntu ya kudedama mpe muntu ya yimbi, kaka mutindu mosi.” Ntangu yayi, beno baka blé, mpe beno baka matiti ya yimbi, mpe beno tula yawu na bilanga. Mpe ba ke fidisa kaka mvula samu na blé, kasi mvula ke kubwaka na zulu ya matiti ya yimbi mutindu mosi ya ke salaka na blé. Mpe, mvula, mpe matiti ya yimbi kele kaka na nsayi mingi samu na mvula mutindu blé kele, mpe ya kele mvula kaka mosi. Mpeve-Santu ya kieleka lenda kubwa na zulu ya muntu ya kukondwa lukwikilu mpe kusala yandi kusala kaka kieleka mutindu mukwikidi ke salaka. Kasi na bambuma ya bawu ba ke zaba bawu; ya kele yina mu ke na kuzonza, ya kele Kidimbu. Mpe Da- . . .

<sup>88</sup> Mpe Jacob, mu zola kutuba, na kati ya kusuka ntima, yandi tubaka, “Mu zaba ti mu me kuwa Nge, Nge kele awa na munu, kasi mu ke bika Nge ve kukwenda.”

Muntu mosi ke mona yawu mbote, mwa sensation ya ntete, bawu ke telama mpe ke dumuka na zulu mpe na ntoto, ba ke kima mbangu na kulwale, ba ke tuba, “Mu me kuzwa Yawu, mu me kuzwa Yawu, mu me kuzwa Yawu.” Oh, ve. Huh-uh. Ve.

Jacob vwandaka kuna tii kima mosi salamaka, yina salaka yandi kutambula mutindu yankaka, salaka yandi muntu ya kuswaswana, samu ti yandi vwandaka tii yina salamaka. Mpe yandi vwandaka na kiyeka. . . Biblia me tuba, “Yandi simbaka tii kuna yandi nungaka.” Wapi mutindu muntu lenda nunga Nzambi? Kasi beno lenda sala yawu. Beno lenda sala yawu. Muntu lenda nunga Nzambi.

<sup>89</sup> Kilumbu mosi ya vwandaka na muntu mosi na nkumbu ya Ézéchiás, yina ba tubaka na yandi na nzila ya profete, “MUTINDU ME TUBA MFUMU, nge ke kufwa.” Ézéchiás balulaka kizizi ya yandi na kibaka, mpe na kati ya kusuka ntima yandi dilaka, “Mfumu, tala munu. Mu me tambula na ntwala ya Nge na ntima ya kulunga, mpe mu ke na nsatu ya bamvula kumi na tanu diaka,” na manima Nzambi tubaka na yandi ti kima mosi zolaka salama, yandi ke kufwa. Mpe, na kati ya kusuka ntima, yandi sobaka dinaka ya Nzambi. Na kati ya kusuka ntima, kuna, yandi dilaka ngolo mingi na kati ya kusuka ntima.

<sup>90</sup> Jacob vwandaka kuna tii lusakumunu kwisaka, mpe sobaka nkumbu ya yandi na “muntu ya luvunu” na “ntinu mosi na Nzambi.” Ata mpe yinsi yina ba bokilaka na nkumbu ya yandi. Yinga, tata! Yinki ya vwandaka? Bandandu vwandaka samu ti yandi sukaka ntima samu na kima yango. Mpe kilumbu yina landaka ntangu yandi kutanaka na Ésaü, yandi vwandaka ve na nsatu ya mikengi. Yandi kwendaka kuna mpe kutanaka na yandi. Beno me mona? Samu na yinki? Yandi zolaka kukota na kati ya kusuka ntima tii yandi kuzwaka kivuvu.

Mpe beno ke suka ntima tii kuna beno ke kuzwa kivuvu. Kana ve, beno kwisa ve ba sambila samu na beno. Beno kwisa ve na autel. Beno vingila tii ya ke kuma na kati-kati ya luzingu mpe lufwa, samu na beno, na yina kima mosi ke salama. Ya kieleka, kusuka ntima!

<sup>91</sup> Ruth sukaka ntima, kilumbu mosi, ntangu yandi vwandaka ya kutelama na lweka ya Naomi. Yandi zolaka vutuka na bantu ya yandi, na bayina nyonso yandi vwandaka zola, mpe yina nyonso yandi—yandi vwandaka kembila, banzambi ya yandi mpe bantu ya yandi, to yandi zolaka kangama na Naomi? Yinki yandi fwana sala? Mpe yandi kumaka na kati ya kusuka ntima, mpe yandi bokaka, “Kisika nge ke kwenda, mu ke kwenda. Kisika nge ke zinga, mu ke zinga. Kisika nge ke kufwa, mu ke kufwa. Kisika ba ke zika nge, mu ke zika . . . to ba ke zika munu. Mpe Nzambi ya nge ke vwanda Nzambi ya munu.” Yawu yina, yandi sukaka ntima! Nzambi sakumunaka yandi, pesaka yandi mwana ya bakala, Obed. Obed butaka Jessé. Jessé butaka, na nzila ya Jessé kwisaka Yesu. Samu na, kusuka ntima!

<sup>92</sup> Mutindu mwa kento ya kindumba, Rahab, yandi vwandaka na kati ya kusuka ntima. Yandi zabaka ti lufwa vwandaka na ntwala ya yandi. Yandi vwandaka na nsi ya lufundusu. Mpe yandi sukaka ntima, yandi tubaka, “Mu ke bumba beno balangididi. Mu ke sala nyonso. Kaka, beno zenga ndefi na Nzambi ya beno, mpe yinzo ya munu ke zinga.” Yawu yina.

Yandi tubaka, “Mu ke . . . Kana beno baka kidimbu yayi, ya ke salama.”

<sup>93</sup> Éliézer sukaka ntima ntangu ba pesaka yandi kizitu ya kusosa kento ya makwela samu na Isaac. Éliézer ya Damas

vwandaka muntu ya nene. Ba zolaka yandi na Abraham, mpe yandi tulaka kivuvu na Abraham na kukwenda kuna mpe kusosa kento ya makwela, kifwani ya kieleka ya kento ya makwela, samu na mwana ya yandi ya bakala, Isaac. Na nzila ya yina ke kwisa Klisto.

<sup>94</sup> Ntangu yayi, Éliézer, na kuvwandaka muntu ya kimpeve, zabaka yina ya zola kutuba. Mutindu ya kento ya mbote zolaka vwanda kento ya bakala yina—yina. Mpe wapi mutindu yandi zolaka sola yawu? Na ngunga yina yandi sukaka ntima kivuvu, ntangu yandi kumaka na mbanza, yandi sambilaka mpe tubaka, “Mfumu Nzambi!” Yawu yina. Ntangu beno ke suka ntima, beno kwenda sambila. “Mfumu Nzambi, bika kisadi ya kento ya ntete yina ke basika mpe ke pesa maza na bakamela, mpe ke pesa munu maza ya kunwa, kuvwanda yandi.” Yandi sambilaka na ngunga ya yandi ya kusuka ntima.

<sup>95</sup> Rebecca, kisadi ya kento ya kitoko, kwizaka, pesaka maza na kamela. Mpe na manima yandi tubaka, “Kukanga munu ve na nzila ya munu.” Yandi zolaka kwiza na ntangu ya lukanu kana yandi zolaka kwenda. Yandi vwandaka kifwanukusu ya Kento ya makwela. Yandi zolaka—yandi zolaka kwenda mpe kukwela bakala yina yandi me monaka ntete ve? Ntangu yayi, ya kele kima ya nene. Ata mbala mosi ve ti mu me monaka yandi, kasi yandi kuwaka kaka na nzila ya kisadi ya yandi.

<sup>96</sup> Ya kele kifwanukusu ya Kento ya makwela. Beno me monaka Klisto ata mbala mosi ve. Kasi beno ke kuwaka, na nzila ya bisadi ya Yandi, yina Yandi kele. Beno ke tekisa nyonso, beno ke bika bayinzo ya beno, nyonso yankaka yina ya ke lombaa, samu na kwenda kutala Yandi. Ntangu yayi beno tala, mpe yandi bakaka lukanu, kifwanukusu ya Kento ya makwela, bikaka yinzo ya yandi ya denomination, beno me mona, samu na kukwenda.

<sup>97</sup> Jonas, yandi ba losaka yandi na zulu ya bwatu na ntangu ya kitembo, na nsi ya nzadi, na kati ya kivumu ya baleine. Bivuvu nyonso vwandaka me kwenda. Kasi yandi banzaka na mabanza ya yandi ti Salomon, na mbielokolo ya tempelo, yandi tubaka, “Mfumu, kana bantu ke na mpasi bisika nionso, mpe ba ke baluka na tempelo yayi mpe ba ke sambila, na yawu nge ke kuwa bawu.” Mpe yandi balukaka na kati ya kivuvu ya baleine, yilamaka samu na kuzwa kisika mosi samu yandi fukama, mu banza, na bima ya kati ya kivumu ya baleine na zulu ya yandi.

Kuna yandi sambilaka na kati ya kusuka ntima. Mpe na kati kuna, yandi sukaka ntima; kaka mwa ndambu ya mupepe kele nyonso yina yandi kuzwaka na kati ya kivumu ya baleine. Mpe na kati ya mwa mupepe yina yandi vwandaka benda, mu banza yandi zabaka ve wapi lweka yandi vwandaka, mpe yandi tubaka, “Mfumu, mu ke kwikila ti mu ke tala na ntwala ya tempelo ya Nge.” Mpe na mwa mupepe fioti kaka samu na kukota, na kati ya kusuka ntima, yandi sambilaka, na nsi ya mambu yina. Ya me

salamaka ata fioti ve na ntwala, kasi yandi sukaka ntima. Yandi sambilaka, mpe Nzambi bumbaka yandi na luzingu bilumbu tatu mpe bampimpa tatu, mpe vulusaka yandi na kisika yina samu na kuvulusa nsungu ya yandi. Kusuka ntima!

<sup>98</sup> Anne, kento ya kisita na kati ya Biblia, yandi vwandaka na nsatu ya mwana, mpe yandi zolaka kumanga kudya samu na yandi. Mpe yandi mangaka madia mpe sambilaka tii kuna nganga-Nzambi na tempelo banzaka ti yandi vwandaka ya kulawuka malafu. Yandi sukaka ntima mingi! Na bakento yankaka yina vwandaka tala mutindu ya bonnet yina yankaka vwandaka lwata; mpe beno zaba mutindu ya ke kwendaka; mpe yankaka yina monaka mutindu ya bilele yina bawu vwandaka na yawu, mpe vwandaka zonzila bima yina vwandaka salama na ferme. Kasi Anne ve; yandi lutaka na kati ya nkonga ya muvimba mpe kwendaka na autel. Yandi mangaka madia. Yandi zolaka ti nsoni ya yandi kukatuka.

Wapi luswaswanu ya kele bubu yayi. Ya kele na kutala nsoni na kuzwa mwana. Kuna ya vwandaka—ya vwandaka nsoni ve na kuzwa mosi.

Mpe yandi fukamaka. Mpe yandi talaka ata fioti ve lukumu ya tempelo. Yandi talaka ata mbala mosi ve nganga-Nzambi ya kulunga na yina yandi vwandaka basika. Yandi vwandaka na kati ya kiadi mingi ti masa ya meso ya yandi vwandaka kulumuka na matama ya yandi, mpe yandi vwandaka dila, yandi sukaka ntima, “O Mfumu Nzambi, pesa munu mwana. Pesa munu mwana!”

<sup>99</sup> Mpe, beno tala, yandi vwandaka ve munimi. Ntangu Nzambi kuwaka yandi, mpe pesaka yandi mvutu na kisambu mpe pesaka yandi mwana ya bakala, yandi vutulaka yandi na Nzambi. Mpe samu ti yandi vwandaka zola ve kuvwanda munimi na manima Nzambi pesaka yandi mvutu na kisambu, Yandi pesaka yandi profete. Oh, yina vwandaka lusakumunu ya kulutila. Oh, Yandi kele kaka ya kufuluka na yawu, mwa bima yina ya kulutila yina Yandi ke pesaka. Kaka mwana ve, kasi profete. Mpe vision vwandaka diaka ve samu na bamvula mingi, mingi, na Israel. Samuel, profete ya ntete, bamvula mingi, mingi, samu mama mosi sukaka ntima; ti yandi zolaka kuzwa bana ve, mpe yandi lutaka bamvula ya kubuta, na kutala bamvula makumi sambanu, makumi sambwadi. Mpe yandi sambilaka na ntima ya kusuka, yandi zolaka kuzwa mwana yayi! Yinki ya vwandaka? Nzambi zonzaka na yandi, kukondwa ntembe.

<sup>100</sup> Beno lenda kusuka ntima ve tii Nzambi ke zonza na beno. Oh, Dibuundu, telama mpe kukiningisa nge mosi! Beno kanga konsiansi ya beno, beno vumbuka na lufwa, na ngunga yayi! Beto fwana suka ntima, to kufwa! Ya ke na kima mosi me katuka na Mfumu! Mu zaba yawu mutindu MUTINDU ME TUBA MFUMU. Kima mosi ke kwisa, mpe beto ke sala mbote



na kusuka ntima. Ya kele kati-kati ya Luzingu na lufwa. Ya ke luta na kati ya beto mpe beto ke mona yawu ve.

<sup>101</sup> Samu ti yandi vwandaka ve munimi, ba pesaka yandi profete.

<sup>102</sup> Kento ya Sunamite vwandaka na mwa mwana-bakala yina profete zonzilaka Ndinga ya Mfumu kuna, ata ti yandi vwandaka kiboba mpe bakala ya yandi vwandaka kiboba. Ba vwandaka ve na bana, kasi yandi vwandaka mutindu profete yayi—yayi. Mpe yandi zabaka ti yandi vwandaka muntu ya Nzambi. Yandi zabaka ti yandi vwandaka muntu ya lukumu, bakala ya kieleka. Yandi kotaka na yinzo, bakala ya yandi vwandaka kuna ve, mpe nyonso yankaka dyaka. Yandi vwandaka bakala ya santu. Ba lendaka mona ti yandi vwandaka muntu ya lukumu. Yandi vwandaka tala yandi kusala bidimbu mpe mambu ya ngitukulu. Yandi kuwaka yandi kutuba bima yina salamaka. Yandi vwandaka bakala ya lukumu, ya santu.

Yandi tubaka na bakala ya yandi, “Mu ke mona ti bakala yayi me telama na beto kele bakala ya santu.” Mama ya yinzo, yandi zabaka ti yandi vwandaka bakala ya santu. Mpe yandi tungaka mwa yinzo mosi kuna samu na yandi, samu ti yandi vwanda ve na nsoni. Yandi lendaka kwiza kuna ntangu yandi zolaka, mpe nyonso yina. Yandi tulaka mwa mbeto kuna, mpe—mpe karafe ya masa, mpe nionso yina, na yawu yandi zolaka sukula yandi mosi mpe kuzwa kima ya kunwa. Mpe yandi lendaka kaka kufidisa kisadi ya kento kuna, to muntu mosi, kapita ya malafu, na—na madya mosi samu na kudisa yandi, mpe ke kwisa kuna mpe ke tuba na yandi na kilumbu, to kima mosi.

<sup>103</sup> Mpe, na yina, ntangu Elie monaka lutondo yayi ba me sala na yandi. Mpe ya kele ya kusonika, “Yina beno ke sala na bana ya Munu ya fyoti, beno ke sala yawu na Munu.” Na yawu yandi monaka ti, kento vwandaka zitisa Nzambi mutindu yandi zitisaka profete yayi, mutindu yandi monaka Nzambi na kati ya profete. Mpe, na yina, yandi zolaka kima ve samu na yawu. Ya vwandaka ve na kati ya ntima ya yandi samu na nyonso. Yandi salaka kaka yawu samu ti yandi zolaka Nzambi. Yandi salaka yawu ve samu na lusakumunu mosi. Yandi salaka yawu kaka.

<sup>104</sup> Ntangu yayi, ntangu yayi Elie tubaka, “Kwenda yufula yandi, mu ke tuba na ntinu samu na yandi? Mu kele nkundi ya ntima. To, kapitene ya mfumu, mu—mu zaba yandi mbote-mbote. Ya kele na lemvo mosi, kima mosi mu lendaka sala samu na yandi, mu zola pesa yandi kima mosi samu na wapi mutindu yandi me vwanda samu na munu. Yandi kele—yandi kele disa munu. Yandi me bika munu kulala na bambeto. Mpe—mpe yandi vwandaka kieleka mbote mingi samu na beto. Ntangu yayi yinki mu lenda sala?”

Yandi tubaka, “Ve, mu ke zingaka kaka na kati-kati ya bantu ya munu. Beto kele—beto kele mbote. Beto ke na kuzinga, mpe yimeni. Beto ke na nsatu ya kima mosi ve.”

Mpe Guéhazi tubaka na yandi, “Kasi yandi kele ve na bana.”

<sup>105</sup> Kuyituka ve mutindu Guéhazi monaka yawu, kukondwa ntembe profete monaka vision, samu yandi tubaka, “MUTINDU ME TUBA MFUMU. Kwenda tuba na yandi, na ntangu ya kulunga, to na ntangu ya mbote, na manima ya mvula mosi, yandi ke kuzwa mwana.”

<sup>106</sup> Mpe mwana butukaka. Ntangu yandi vwandaka na bamvula kumi na zole. . . Mutindu bankwelani ya kiboba yina zolaka zola mwana-bakala yayi ya fioti, mwana ya bawu mosi kaka. Mpe kilumbu mosi yandi basikaka samu na kuzenga blé, na papa ya yandi. Ya zolaka vwanda pene-pene ya kati-kati ya kilumbu, tiya ya nzutu ya yandi mataka mingi, mu banza, samu yandi bandaka na kuboka, “Yintu ya munu.” Yandi belaka mingi mpe mingi. Tata ya yandi zolaka katula yandi na kilanga, mpe ya vwandaka diambu ya nswalu kuna, ti yandi fidisaka kisadi mosi, mpe yandi fidisaka yandi kuna.

<sup>107</sup> Mama yango tulaka yandi na zulu ya makulu ya yandi tii na ntwala ya midi, mpe yandi kufwaka. Beno tala, mwana ya yandi mosi kaka, yina Mfumu pesaka yandi, na nzila ya kisambu mpe nsilulu ya profete mpe MUTINDU ME TUBA MFUMU. Yandi zabaka ti ya vwandaka na kima mosi vwandaka tambula mbote ve kisika mosi kuna. Ya zolaka sala kaka ve. Wapi mutindu Nzambi pesaka yandi mwana yina mpe bikaka zola ya yandi—ya yandi kukwiza na bébé yina? Kasi yandi lombaka yawu ata fioti ve. Yandi vwandaka kiboba mingi samu na kuzwa yawu. Diboko ya Nzambi zolaka samuna yawu. Bakala mosi zonzaka yawu, profete. Mpe bébé yayi kuna na mutindu yayi, kufwaka, mwana ya yandi kaka.

Na yina yandi tubaka na kisadi, “Kanga mpunda ya munu, mpe nge ke nata mpunda, mpe kutelama ve. Kana muntu meka na kukanga beno, beno tuba ve ndinga mosi, mpe beno kwenda mbala mosi na Mongo Carmel. Kuna na kave mosi kisika mosi kuna, na manima, ya kele na kisadi ya Nzambi ya Kulutila Zulu; yandi yina tubaka na munu, MUTINDU ME TUBA MFUMU, mu ke kuzwa bébé. Mu zola zaba samu na yinki Nzambi me sala yayi.” Na yawu yandi tubaka. . . “Kwenda na ntwala mpe kutala ve mbuluku yina. Ti yandi kima kaka na ngolo nyonso kele na kati ya yandi. Bika yandi kima mbangu tii nge ke kuma kuna.” Kusuka ntima!

<sup>108</sup> Mpe Elie profete telemaka, yandi talaka, mpe tubaka, “Tala Sunamite yina, mpe, yandi, kima mosi ke tambula mbote ve na yandi. Nzambi me bumba yawu na munu. Mu zaba ve yina ke tambula mbote ve.” Yandi tubaka, “Kwenda, kutana na yandi.

Mu me. . .Beto sala nswalu. Ya kele na kima mosi ke tambula mbote ve.”

Kusuka ntima kwisaka na zulu ya profete, kusuka ntima kwisaka na zulu ya kento yina. Beno me mona, bawu vwandaka vukana; mosi vwandaka zola kuzaba yina Ndinga ya Mfumu vwandaka, mpe yankaka yina zabaka ve yinki Ndinga ya Mfumu vwandaka. Yawu yina. Mosi vwandaka zola kuzaba yawu, mpe yankaka yina zabaka yawu ve. Kento yina zolaka kuzaba yawu, mpe profete zabaka yawu ve. Yandi tubaka, “Nzambi me bumba yawu na munu. Mu zaba ve yinki kutuba na yandi ntangu yandi ke kuma awa.”

Na yina yandi vwandaka kaka kuna. Yandi telemisaka diboko ya yandi, yandi tubaka, “Nionso ke tambula mbote na nge? Nionso ke tambula mbote na bakala ya nge? Nionso ke tambula mbote na mwana yayi?”

<sup>109</sup> Ntangu yayi, kento yango kumaka na nsuka ya kusuka ntima ya yandi. Yandi tubaka, “Nyonso kele mbote!” Nkembo! “Nionso ke tambula mbote!” Kusuka ntima ya yandi sukaka. Yandi monaka kisadi ya Mfumu. Kana yandi vwandaka kuna ve, yandi zolaka kaka kusuka ntima. Kasi, beno me mona, yandi vwandaka kuna. Yandi tubaka, “Nionso kele mbote!”

Élisée banzaka, “Mbote, yinki ke na kusalamaka ntangu yayi?”

<sup>110</sup> Na yina yandi kimaka mbangu mpe yandi kubwaka na nsi ya makulu ya yandi. Yina monanaka ya mumesanu ve, na yina Guehazi telemisaka yandi. Yandi tubaka, “Bika yandi swi, kusala yawu ve.” Elie tubaka na kisadi ya yandi, “Kusala yawu ve. Bika yandi swi. Kima mosi ke tambula mbote ve. Nzambi ke bumba yawu na munu.” Na yina yandi monisaka na yandi ti bébé yango kufwaka.

<sup>111</sup> Ntangu yayi, profete zabaka ve yinki kusala. Yandi tubaka, “Guehazi, baka yinti yayi mu ke tambudilaka.” Yandi zabaka ti nyonso yina yandi simbaka vwandaka ya kusakumuka, samu ti ya vwandaka yandi ve, ya vwandaka Nzambi na kati ya yandi. Yandi zabaka nani yandi vwandaka. Yandi zabaka ti yandi vwandaka profete. Na yawu yandi lokotaka nkawa yayi mpe tubaka, “Guehazi, beno baka yayi, mpe beno kwenda mpe beno tula yawu na zulu ya mwana yango. Mpe kana muntu me tuba na nge, nge ke suka ntima. Mpe kupesa mbote na muntu ve, mpe kubika ve. . . Beno landila kaka na kukwenda na ntwalu, kutuba ve na muntu mosi. Tula yawu na zulu ya mwana yango.”

<sup>112</sup> Kasi, kento yango, yina sukisaka ve kusuka ntima ya yandi. Yina sepelisaka ve yina yandi kwendilaka. Yandi tubaka, “Mutindu Mfumu Nzambi ke zinga, mu ke—mu ke bika nge ve tii kuna nge ke kwenda tuba na mwana yina.”

<sup>113</sup> Mpe Elie sukaka ntima. Mpe yandi kwendaka kuna, kulukumakaka na bala-bala, yandi na kento yango. Mpe ntangu

ba kumaka kuna, . . . bantu nionso vwandaka kuna na ngaanda ya lupangu, ba vwandaka boka mpe ba vwandaka dila. Mpe kento yango salaka kima ya kulutila mbote yina zolaka salama. Yandi bakaka bébé yango mpe lalisaka yandi na zulu ya mbeto kisika Elie vwandaka. Ya vwandaka mbote kaka mutindu nkawa ya yandi. Mpe yandi vumbukaka ve kuna, na yina kima yango salaka ve. Yandi zolaka kuzaba kima ya kuswaswana.

<sup>114</sup> Profete kotaka. Ntangu yayi yandi me suka ntima. Ntangu yayi yinki yandi ke sala? Mpe beto ke mona na kati ya Biblia ti yandi mataka mpe kulumukaka kuna, yandi sukaka ntima. “Mu zaba kima yankaka ve ya kusala, Mfumu. Munu yandi yayi. Nge me tuba na munu na kuzonza na kento yina, mpe MUTINDU ME TUBA MFUMU. Mpe ya vwandaka kieleka mutindu mu tubaka na yandi, samu ti Nge tubaka na munu. Ntangu yayi, yandi yina kele na kati ya mpasi, mpe mu zaba ve yinki kusala. Ya kele na mwana-bakala ya kufwa. Yinki mu lenda sala, Mfumu?”

<sup>115</sup> Kukondwa ntembe ti Mpeve-Santu tubaka, “Kana Nzambi kele na kati ya beno, na yina lala nge mosi na zulu ya bébé yango.” Kima ya ntete beno zaba, yandi telamaka, yandi kimaka mbangu mpe tulaka maboko ya yandi na zulu ya maboko ya yandi, mbombo ya yandi na zulu ya mbombo ya yandi, bikoba ya yandi na zulu ya bikoba ya yandi. Mpe ntangu yandi lalaka yandi mosi na zulu ya mwana yango, bébé yango bulaka etse bambala sambwadi. Kusuka ntima sukaka.

Bébé yango vutukaka na luzingu, samu ti kusuka ntima yina nataka kento yina na profete, mpe kusuka ntima nataka profete na bébé. Mpe kusuka ntima na kati ya bawu zole nataka Nzambi na kukota na kisalu. Na zola ya Nzambi, mpe zola samu na bantu ya yandi, nataka zola ya Nzambi kuna, mpe losaka lukwikilu na ndilu ya bitumba, mpe kisalu salamaka. Diambu sukaka. Amen! Yawu yina. Kusuka ntima ke salaka yawu. Ya kieleka! Yandi zolaka ve kukwenda.

<sup>116</sup> Mpofo Bartimhéé banzaka ti Yesu zolaka luta pene-pene ya yandi, yandi vwandaka kuna pene-pene ya mwelo, mpofo yina vwandaka lomba, makabu. Kima ya ntete beno zaba, yandi kuwaka makelele; Yesu vwandaka luta na lweka. Yandi tubaka, “Nani ke luta kuna?” Muntu mosi pusaka yandi na ntoto. Yandi tubaka, “Pardo, mpangi, nani ke na kuluta kuna?”

Mosi ya bawu, mbote, ya lendaka vwanda mwa kento mosi ya kilandi, tubaka na yandi, yandi tubaka, “Tata, nge zaba ve Nani yina ke na kuluta?”

“Ve. Mu ke kuwa bayankaka ya bawu kutuba, ‘Ya kele na maziamu ya kifuluka na bantu ya kufwa awa. Kana nge ke vumbulaka bantu ya kufwa, kwenda vumbula bawu.’ Ya kele muvwezi to muntu mosi?”

“Ve. Beno me kuwaka ntete Profete yina ya Galilée, Profete yina ya ntwenya ba bokilaka Yesu ya Nazareth?”

“Ve.”

“Mbote, beno zaba, na kati ya Biblia ya ke tuba na mikanda ya beto ti Mwana ya David ke vumbuka samu na kuvwanda na zulu ya yawu. Ya kele Yandi.”

“Ya kele Yandi? Ya kele Yandi, mpe Yandi ke na kuluta?”

Kusuka ntima nataka yandi na kuboka, “O Yesu, Nge Mwana ya David, lemvokila munu!”

Kuluta munu ve, O Mvulusi ya ngemba,  
Kuwa kudila ya munu;  
Ntangu Nge ke bokila bayankaka,  
Kubika munu ve.

“O Yesu!”

Bayankaka na kati ya bawu tubaka, “Kanga yinwa! Nge ke sala makelele mingi.”

<sup>117</sup> Kasi yandi sukaka ntima. Kana Yandi lutaka na lweka, yandi zolaka vwanda ata fioti ve na bweso yankaka. Beto lendaka ve dyaka; yayi lendaka vwanda nokila ya nsuka. Kusuka ntima! Yandi bokaka, “O Yesu!” Ata nani me tuba na yandi na kuvwanda swi, yandi bokaka kaka mutindu mosi, ti yandi bokaka ngolo mingi. Ntangu bawu tubaka na yandi na kukanga yinwa, yawu salaka ti yandi kuboka dyaka ngolo. Yandi sukaka ntima. Ata muntu mosi ve lendaka kusutope yandi. “Nge Mwana ya David, lemvokila munu!” Mpe yandi bokaka na kati ya kusuka ntima.

<sup>118</sup> Mpe Mwana ya Nzambi, na masumu ya yinza na zulu ya mapeka ya Yandi, vwandaka kwenda na Jérusalem samu kupesama dikabu, kaka na ntangu yina, samu na munkayulu ya yinza, telemaka na dikani ya Yandi. Kusuka ntima, kuboka ya kusuka ntima, telemisaka Mwana ya Nzambi. Yandi tubaka, “Yinki nge ke zola Munu kusala samu na nge?” Oh!

Yandi tubaka, “Mfumu, ti mu kuzwa kumona ya munu.”

Yandi tubaka, “Kwenda nzila ya nge, lukwikilu ya nge me vulusa nge.”

Yina vwandaka yimeni. Kusuka ntima! Ntangu kusuka ntima zola kuzwa kima mosi, kukutana ya kulutila fioti, lukwikilu simbaka yawu. Beno me mona? Yandi tubaka ve, “Ntangu yayi vingila fyoti, vingila fyoti, vingila fyoti, vingila minuti fyoti kuna, ti mu mona kana mu lenda mona ntangu yayi. Mu me monaka ntete ve maboko ya munu, bamvula mingi. Beto tala kana mu lenda mona yawu. Mu me monaka kima mosi ve.” Ntangu Yesu tubaka, “Lukwikilu ya nge me vulusa nge,” yina vwandaka ya kulunga. Yawu yina kaka yandi zolaka.

<sup>119</sup> Kusuka ntima ke bokilaka kima mosi, mpe ntangu kima yango, ata ti wapi mutindu fioti ya kele, ya me kuzwa yawu, ya ke kukwikila kaka kuna, samu ti lukwikilu ke simbaka ntangu

kusuka ntima ke na kupusa yawu. Beno me mona? Zola na kati kuna ke vukana na yawu mpe ke nata yawu na yawu. Kusuka ntima ke salaka Yawu.

Mpofu Bartimée kangaka vision na nswalu nionso.

<sup>120</sup> Pierre, yandi vwanndaka ya kuzatuka, na mpimpa mosi na zulu ya mubu, ntangu yandi sukaka ntima. Mpe yandi bandaka na kuboka, “Kima mosi ke tambula mbote ve. Mu ke mona mpeve mosi ke kwisa, ke tambula na ntuala ya munu!” Masuwa zolaka kudinda. Yandi tubaka, “Kana ya kele Nge, Mfumu, bika mu kwisa na Nge na zulu ya masa.” Mpe yandi kulumukaka na masuwa mpe bandaka; mpe yandi kumaka na boma ntangu yandi bandaka, mpe yandi bandaka na kudinda, mpe kusuka ntima . . . Ata kifu, na kumekaka na kulanda misiku ya Nzambi, . . . Mu banza ti dibuundu ke bakula yawu. Bakala yina vwandaka sala yina Nzambi tubaka na yandi na kusala.

<sup>121</sup> Ntangu yayi, nge Muklisto na nkokila yayi, nge kele na kati ya kusalu, nge ke na kumeka na kulanda lutwadusu ya Mpeve-Santu; mpe cancer me kanga nge, to lufwa me kanga nge, cancer, tuberculose, nionso yina ya kele. Na kati ya kusalu, nge kele na muswa mosi yina Pierre vwandaka na yawu.

“Mfumu, vulusa munu, to mu ke kufwa.” Na kati ya kusuka ntima yandi bokilaka, mpe diboko mosi simbaka yandi mpe basisaka yandi. Nge ke na diambu ya mutindu mosi. Kasi yandi bokaka, “Vulusa munu, Mfumu!”

Yandi kuwaka kuboka ya munu ya mawa,  
Yandi basisaka munu na kati ya bamasa,  
ntangu yayi mu kele na lukengolo. (Beno me mona?)

<sup>122</sup> Yawu yina, ntangu beno ke boka!

<sup>123</sup> Mu banza ti kento yayi, mama, nyonso yina ya vwandaka samu na yandi, mwana ya bakala ya fyoti, to mutekolo ya bakala, to mwana-nkazi, nyonso yina ya vwandaka, bokaka na ntima ya kusuka. Nzambi kuwaka.

<sup>124</sup> Na yina beto ke mona ti, na kati ya kudinda, Nzambi kuwaka yandi. Na kati ya kusalu, yandi bandaka na kudinda. Yandi kubwaka. Ata ti beno me kubwa, yina kele ve na kima ya kusala na yawu. Beto nyonso me kubwaka. Beto kele ya kubwa, na kubanda. Kasi beto kele na Muntu mosi ya kutelama ntangu yayi na diboko ya ngolo, Yina lenda simba beto mpe kutelemisa beto na zulu ya maza.

<sup>125</sup> Kana beno me sala kifu, kento mosi salaka kifu, bakala mosi salaka kifu, mwana-bakala mosi to mwana-kento mosi salaka kifu; beno dinda ve. Beno boka, na kati ya kusuka ntima, “Mfumu, vulusa munu, to mu ke kufwa!” Beno suka ntima samu na yawu. Nzambi ke kuwa beno. Yandi ke kuwaka ntangu

nionso moyo yina me suka na ntima. Yawu yina mu ke meka na kutubila beno.

<sup>126</sup> Mfumu ya beto ya luzolo Yesu, Yandi mosi, na kilanga ya bitumba ya kulutula nene ya yinza, na Gethsémané, Yandi bokaka, na ntima ya kusuka. Yandi zolaka baka masumu ya yinza, to Yandi zolaka kaka kuvwanda na zulu ya ntoto na bilandi ya Yandi ya luzolo, yinki Yandi zolaka kusala? Kasi beno tala mbote kukikulumusaka ya Yandi mutindu Yandi kukikulumusaka Yandi mosi, “Ve luzolo ya Munu kasi luzolo ya Nge kusalama,” me kukikulumusaka Yandi mosi na ntwala ya Ndinga, Ndinga ya nsilulu ya Nzambi ya Mazulu.

Beno tala, na yina, Yandi kwendaka mwa ntama mingi. Mpe kana Yandi kwendaka mwa ntama mingi, wapi mutindu dyaka beto zolaka kwenda mwa ntama mingi. Beno me mona? Mpe beno tala, Masonuku ke tuba awa, na Luc, ti Yandi sambilaka mingi. Mpangi-bakala, mpangi-kento, kana Yesu zolaka sambila na mutindu ya kieleka, wapi mutindu beto fwana sambila na mutindu ya kieleka. Kana Klisto, Nzambi ya Mazulu, yina kumaka nsuni, zolaka sambila na mutindu ya kieleka, na yina wapi mutindu diaka beto, bansumuki yina me vuluka na lemvo, beno fwana sambila na mutindu ya kieleka! Kana—kana lukanu me losa Mwana ya Nzambi na kati ya kusuka ntima, yinki ya ke sala na beno mpe munu? Na ntima ya kusuka beto fwana boka.

<sup>127</sup> Nzambi, na bilumbu yayi ya nsuka, me monisama Yandi mosi na ntwala ya beto, na nzila ya bidimbu ya Yandi ya nene mpe ngolo, lendaka nata beto na kusuka ntima. Ya kele kieleka. Mpe luzolo ya Yandi samu na kubelusa beto mpe kuvulusa beto, zolaka losa beto nyonso na kati ya kusuka ntima samu na kuzwa Ditadi yina ya kubeluka. Ya kele kieleka.

<sup>128</sup> Beno tala, kana Florence Nightingale. . . Mutekolo ya kento ya Florence Nightingale yina bandaka Croix Rouge. Beno monaka foto ya yandi na buku, vwandaka na ba-kilo pene ya makumi tatu. Cancer vwandaka me kudia yandi. Na Londres, na Angleterre; ba nataka yandi na Afrika, na Londres, na Angleterre. Mpe kuna na ntima ya kusuka. . . Mpangi Bosworth sonikaka na yandi mpe tubaka na yandi, yandi tubaka, “Beto lenda kwiza ve na Afrika.”

<sup>129</sup> Yandi vutulaka mvutu, yandi bokilaka infirmière samu na kusonika mpe yandi tubaka, “Mu lenda ve kuningana. Mu lenda ve kusala yawu.”

Yandi lakisaka foto. Beno monaka foto. Beto lendaka tula kaka mwa kitini na zulu ya yawu. Ya vwandaka kaka na mwa nsinga pene-pene. Mu banzaka ti ya lendaka vwanaka na muntu mosi, yina tulaka yawu na kati ya buku, yina lendaka sawula samu ti yandi vwanaka. . . nzutu ya yandi vwanaka pwelele mingi kuna, ti. . . mpe beto tulaka mwa kima mosi na zulu ya yandi *awa*. Yandi vwanaka kaka na mwa kitende, lisume ba

me tulula kuna na zulu, na zulu ya luketo ya yandi. Kasi kuna na zulu, ya vwandaka ve na kima mosi. Mpe ata mpe. . . Kasi beto banzaka ti beto ke tula mwa kitini ya zulunale na zulu kuna mpe kukanga foto. . . kukanga yawu foto. Samu na kukeba bantu yina kele ve na mutindu ya mbote na dibanza ya bawu ya kubanza, ti bawu zolaka sawula munu ve ti mu me tula foto yina na zulunale.

<sup>130</sup> Mpe kuna ntangu dokotolo tubaka ti yandi lenda ve kuningana, mpe yandi zabaka ti mu ke kwenda kutala Angleterre, yandi tubaka na bawu na kutula yandi na zulu ya civière, mpe kunata yandi na mpepo, mpe kunata yandi na Londres, na Angleterre, mpe fidisaka mukengi mosi na mpepo na ntuala mu kwenda na Buckingham Palace, yandi fidisaka mukengi mosi kuna samu na kukwisa sambila samu na yandi. Mpe yandi kwendaka ntama mingi tii kuna yandi lendaka tuba na munu ve. Ba zolaka telemisa maboko ya yandi samu na kutula yawu na maboko ya munu.

<sup>131</sup> Beno zaba mutindu Londres kele, ndambu ya beno basoda vwandaka kuna. Ya kele ntangu nyonso na lubungi mingi. Mpe mu fukamaka kuna na lweka ya nela, mpe yandi. . .

Masa ya meso vwandaka basika. Yandi zolaka. . . Mu zaba ve wapi mutindu yandi vwandaka kaka na madidi mingi samu na kubika masa ya meso kukwisa. Ya vwandaka kaka mikwa, mpusu na zulu ya yawu; mpe makulu ya yandi—ya yandi na zulu awa na luketo vwandaka ve ya kufuluka, ya monana samu na munu, mutindu pene ya ba-centimetre tanu na zulu, to ba-centimetre sambwadi. Misisa ya yandi vwandaka ya kukangama na misisa. Wapi mutindu yandi vwandaka zinga, mu zaba ve. Beno monaka foto ya yandi na manima.

<sup>132</sup> Mu fukamaka na lweka ya mbeto. Ntangu yayi, yandi sukaka ntima; kana mu lendaka kwisa to ve, ba ke nata yandi, na mutindu nionso. Mpe mu kwendaka kuna, ntima ya munu vwandaka basika menga na kati ya munu, samu na lukwikilu ya mwa kivangu yina ya mputu, yina vwanda kufwa, mpe mu sambilaka na ntima ya muvimba yina vwandaka na munu. Mpe na ntangu mu bandaka na kusambila, yembe mosi ya fioti kwisaka, pumbukaka na zulu ya nela, yandi bandaka na kumata mpe kukulumuka, ke na kuniunguta. Mu banzaka ti ya vwandaka lombilu. Mu vwandaka ve na Angleterre kasi pene ya ngunga mosi, kaka mu katukaka na aéroport kuna. Mpe mu banzaka ti ya vwandaka lombilu mosi. Mpe ntangu mu telemaka, mpe tubaka, “Amen,” ya me pumbuka.

Mpe mu bandaka na kuyufula bampangi, bawu kuwaka yembe yina. Mpe bawu vwandaka zonzila na zulu ya yawu, mpe ntangu mu bandaka na kutuba, “Beno me mona, yina yembe yina zola kutuba. . .” Ya basikaka, “MUTINDU ME TUBA MFUMU, nge ke zinga mpe ke kufwa ve.”



Mpe yandi ke na kuzinga bubu yayi. Samu na yinki? Kusuka ntima. Kusuka ntima nataka kento yango na kubaka lukanu, samu na kuzinga to kufwa. Kusuka ntima yidikaka yawu ti yandi fwana vwanda kuna na ntangu yina mu vwandaka kuna. Mpe kidimbu ya Nzambi, Yandi fidisaka yembe, samu na kupesa MUTINDU ME TUBA MFUMU. Kusuka ntima!

<sup>133</sup> Ntangu mpangi-kento, kiboba Hattie Waldrop ya Phoenix, na Arizona, yandi katukaka na lweka ya lukinuku, na lukutakanu ya munu ya ntete. Stagiaire mpe bakala ya yandi vwandaka nata yandi; cancer ya ntima. Yandi bakaka lukanu ya yandi, na kumeka na kukuma kuna na lukutakanu, kasi yandi vwandaka yimbi mingi ti yandi vwandaka. . . yandi lendaka dyaka ve kupema, menga vwandaka basika na kati ya ntima ya yandi kisika cancer me kudya na kati ya ntima ya yandi. Ntangu yayi, cancer ya ntima! Ya kele pene ya bamvula kumi na nana, kumi na yivwa me luta, mu banza makumi zole, na mvula 1947 kele ntangu ya vwandaka.

<sup>134</sup> Ntangu yayi, yandi tubaka na bakala ya yandi mpe na stagiaire, “Kana mu kufwa na ndonga yayi, beno nata munu kuna.” Kusuka ntima. Yandi zimbanaka konsiansi. Mu banza ve ti yandi vwandaka ya kufwa; yandi tubaka ti yandi vwandaka. Ntangu yayi, yandi lendaka vwanda. Yandi lendaka kuwa bande yayi, beno me mona. Ntangu yayi mu—mu—mu. . . Yandi, yandi tubaka ti yandi vwandaka ya kufwa; mu zaba ve. Ba tubaka na munu, “Ya kele na kento ya kufwa yina ke na kwiza na ndonga.” Mpe ntangu kento yina kwizaka, yandi vwandaka kukondwa luzingu. Mpe ntangu ba nataka yandi kuna, Ndinga ya Mfumu kwisaka; mpe mu kwendaka mpe tentikaka maboko na zulu ya yandi, mpe yandi telamaka mpe kwendaka na yinzo, na kutambulaka. Yayi vwandaka kaka pene, mu zola kutuba, na lukengolo, bamvula kumi na nana me luta, mpe yandi kele kaka na mavimpi ya mbote mpe na ntima ya mbote. . . Yandi ke vwanda na Tucson samu na kukutana na munu ntangu mu ke kuma kuna. Kusuka ntima, “Ata ti mu ke kufwa na nzila, na yina, kasi beno nata munu kuna. Yandi belulaka bayankaka, Yandi ke belula munu.” Ya kukubama!

<sup>135</sup> Ti bantima ya beto kuvwanda ya kufuluka na zola na kilumbu yayi, mpe beto vwanda ya kieleka, mpe na kati ya kusuka ntima. Na manima ya mwa ntangu fioti ntangu ke vwanda me luta mingi.

<sup>136</sup> Jairus kilumbu mosi vwandaka na mwana-kento yina vwanda kufwa. Yandi vwandaka mukwikidi ya ndilu. Yandi kwikilaka Yesu, kasi yandi vwandaka na boma ya kuzonza yawu, samu ti bawu ke tula yandi na ngaanda ya synagogue. Kasi dokotolo me kwiza na suka mosi, mpe me tuba, “Yandi ke na kufwa ntangu yayi.” Kusuka ntima kotaka. Yandi lendaka ve kukisadisa, na kisika ya yandi, samu na kukutana na Yesu ya

Nazareth, samu ti yandi ke zimbisa kisika ya yandi mutindu nganga-nzambi.

Kasi mu ke tuba na beno, ntangu diambu ya nswalu-nswalu kwisaka, yawu losaka yandi na kusuka ntima. Mu lenda mona yandi kusosa mwa kazaka ya yandi ya mulongi mpe yimpu, mpe syelumunaka yawu. Awa yandi kwisaka na kati ya nkonga ya bantu, na kupusaka na nziunga; kisika ya vwandaka na kento yina simbaka kaka lele ya Yandi, mpe nyonso yina, mpe bawu nyonso vwandaka boka. Kasi yandi kotaka mpe tubaka, “Mulongi, mwana ya munu ya kento kele ya kulala pene ya lufwa. Mulongi, Mulongi, mwana ya munu ya kento kele ya kulala pene ya lufwa, mpe kana Nge lenda kwiza tentika kaka maboko ya Nge na zulu ya yandi, yandi ke zinga.” Oh, la la! Kusuka ntima ke sala ti beno tuba bima yankaka, ke sala ti beno sala bima. Ya ke kotisa beno na kusalu. Mwana ya yandi ya kento vulukaka na nzila ya kusuka ntima.

<sup>137</sup> Beto suka ntima, mutindu kento yina ya ntwenya yina vwandaka basika menga. Biblia me tuba ti yandi basisaka mbongo ya yandi nyonso, na minganga, mpe kasi bawu lendaka ve kusadisa yandi. Yandi bandaka na ntangu ya menopause, samu na kufuluka, mpe menga vwandaka basika, mpe ya zolaka ve kukangama. Ntangu yankaka bawu tekisaka ferme, bambuluku, bampunda, mpe nyonso yina ya vwandaka; mpe kima ve zolaka sadisa yandi. Mpe banganga-Nzambi ya bawu tubaka na yandi ti yandi lendaka ve kutambula mutindu yina. Kasi na suka mosi yandi talaka na nsi. Yandi vwandaka zinga na kumu, kuna kisika ferme ya yandi vwandaka, mpe yandi monaka nkonga ya nene ya bantu me vukana pene-pene ya Bakala mosi kuna, mpe bawu tubaka, “Yinki yina?”

Bawu tubaka, “Yina kele Yesu ya Nazareth.” Kusuka ntima me kota.

Yandi tubaka, “Mu kele mutindu muntu ya mpamba. Mu—mu. . . Kasi kana mu lenda simba kaka nsongi ya lele ya Yandi, mu ke beluka.” Mpe yandi lutaka na kutonga nyonso mpe nyonso yankaka. Kasi na manima yandi kumaka na kisika yina, yandi simbaka lele ya Yandi, na kati ya kusuka ntima.

Mpe ntangu Yandi salaka yawu, Yandi balukaka mpe tubaka, “Nani me simba Munu?” Mpe bawu nyonso mangaka yawu. Kasi Yandi talaka bisika nyonso. Yandi vwandaka na dikabu ya nene ya Nzambi. Yandi vwandaka Nzambi; mpe Yandi monaka mwa kento yango mpe tubaka na yandi ti menga ya yandi sutopaka. Kusuka ntima nataka yandi na kusala yawu.

<sup>138</sup> Ya vwandaka kusuka ntima yina nataka—nataka ntinu ya kento ya Sude. Yandi kuwaka ti dikabu ya Nzambi vwandaka sala na nzila ya Salomon. Kusuka ntima nataka yandi na yawu.

<sup>139</sup> Ntima sukaka! Yina kele bantu, mutindu beno, mutindu munu. Ba vwandaka ve ya kuswaswana na beno mpe munu. Ba

vwandaka na ba-sense tanu. Ba vwandaka kudia, mpe kunwa, mpe nionso yina, mutindu beto ke salaka, kuzinga mpe kufwa. Ba vwandaka bantu.

<sup>140</sup> Yawu nataka yandi na kusuka ntima ti yandi bakaka kitini ya kimfumu ya yandi. Ya me nata yandi na kisika mosi tii kuna yandi banzaka ve na ba-Ismaélites yina ke yiba yandi na ntoto ya kuyuma, bilumbu makumi yivwa na zulu ya mukongo ya Kamela kuna na Ntoto ya kuyuma ya Sahara. Kusuka ntima! Yandi ke na kwenda, na mutindu nyonso. Mpe ntangu yandi kumaka kuna, ya vwandaka ve na kima yina kangaka Salomon kasi na yina yandi tubaka na yandi bima yina yandi zolaka kuzaba. Kusuka ntima! Yesu tubaka, “Yandi ke telema na Kilumbu ya Lusambusu, na nsungi yayi, mpe ke fundisa yawu, samu kulutula nene na Salomon vwandaka awa.” Kusuka ntima!

<sup>141</sup> Samu na kumanisa mu lendaka tuba yayi. Ntama mingi ve, kuna na Mexique, mu monaka kima mosi me suka ntima. Mu kwendaka kaka na estrade, kuna na stade ya nene, mpe bantu vwandaka kuna kubanda ngunga ya yivwa na suka yina, mpe ya vwandaka pene ya ngunga ya kumi na nkokila yina. Kiboba ya mpofo, na nkokila yina na ntwala, meso ya yandi vwandaka ya muvimba ya kufwa pene ya bamvula makumi tatu, yandi kuzwaka kumona ya yandi, mpe vwandaka kwenda kuna na mbanza kilumbu yina, yandi vwandaka pesa kimbangi. Mwa kinkuku ya bilele ya ntama, vwandaka na kutala ya kutulula kuna mu banza na ba-metre makumi tatu, makumi yiya, yinda mutindu *yayi*, kaka matambala ya ntama. Mu banza ya vwandaka na bantu mafunda makumi yiya, makumi tanu kuna. Mpe bayimpu ya ntama mpe matambala ya ntama, yina vwandaka ya bawu, mu banza ti bawu fwana baka lukanu yina na kati ya bawu. Mpe mvula vwandaka noka mingi.

<sup>142</sup> Mpe bawu kulumusaka munu nsinga mosi, na zulu ya kibaka, mpe mu mataka na estrade. Mulongi . . . Bakala yina kele ya kuvwanda awa, bawu nataka yandi . . . Yandi mpe mwana ya yandi ya kento katukaka na Michigan baminuti fyoti me luta, zonzaka yina na Mpangi Arment. Beto ke bambuka moyo na yandi awa. Yandi kele na babala-bala ya Nkembo na nkokila yayi. Mpangi Arment vwandaka kuna, mpe yandi katulaka kazaka ya yandi, mpe yandi telemaka na kati ya mvula, mpe pesaka yawu na Mpangi Jack Moore samu na kulwata, samu ti Jack vwandaka tekita. Muntu yayi ya sude vwandaka pene ya kukangama na madidi na kati ya madidi yina ya mvula kuna na Mexico. Mpe yandi vwandaka ya kutelama kuna.

<sup>143</sup> Mpe Billy Paul kwizaka na munu, mwana ya munu ya bakala, mpe tubaka, “Papa, nge fwana sala kima mosi. Ya kele na kento mosi ya Mexique kuna na bébé ya kufwa yina kufwaka na suka yayi. Mu kele ve na ba-huissier mingi samu na kutelemisa yandi na ndonga.” Kana kutentika maboko na zulu ya muntu yina ya kufwa meso pesaka yandi kumona ya yandi, kutentika

maboko na zulu ya bébé ya yandi ya kufwa ke pesa yandi luzingu ya yandi. Yandi vwandaka muntu ya Katolika. Mpe, yandi, ba lendaka ve kukanga yandi.

Mpe Mpangi Espinoza mpe bayankaka tubaka na yandi ti, “Beto kele diaka ve na bakalati ya bisambu. Nge fwana vingila tii na nkokila yankaka yina.”

<sup>144</sup> Yandi tubaka, “Bébé ya munu me kufwa. Yandi me kufwa kubanda na suka yayi. Mu fwana kota kuna.” Mpe yandi vwandaka kwiza, kalati ya bisambu to ve. Mpe bawu tandaka pene ya bankama tatu ya ba-huissier kuna. Mpe yandi vwandaka luta kaka na yisi ya makulu ya bawu, mpe vwandaka dumuka na zulu ya mikongo ya bawu, mpe kwendaka mbangu na bébé yayi ya kufwa, mpe kubwa na kati-kati ya bawu. Ya vwandaka sala ata luswaswanu ve samu na yandi; yandi vwandaka meka na kukuma kuna. Yandi sukaka ntima. Nzambi zonzaka na ntima ya yandi, ti, “Nzambi zolaka pesa meso, zolaka pesa luzingu.” Oh, la la! Yandi sukaka ntima. Kima mosi vwandaka pela na kati ya yandi.

<sup>145</sup> Oh, bambevo, kana beno bika yawu pela na kati ya beno baminuti fyoti, mpe beno tala yina ke salama, kusuka ntima ya mutindu yina. Nzambi yina lendaka belusa mwana-bakala yayi ya ntwenya na nkokila yina, lendaka belula mama yina na cancer, kubelusa bakala yayi, mpe kusala yayi, Mademoiselle Florence Nightingale, oh, makumi ya mafunda! Yandi, yina, nzikisa ya kukondwa ntembe; mvumbukulu ya bantu ya kufwa, mpe kubeluka ya bambevo, mpe nionso yankaka. Kana Yandi kele Nzambi, Yandi lenda sala yawu; Yandi kele Nzambi mazono, Yandi kele Nzambi bubu yayi. Beno suka ntima, na yina beno ke kuzwa kima mosi.

<sup>146</sup> Na yina, na kati ya kusuka ntima yina, yandi landilaka na kunwanina. Mu tubaka na Mpangi Jack Moore, mu tubaka, “Yandi zaba munu ve. Yandi me monaka munu ata fioti ve. Yandi zaba ve nani kele awa na zulu ya estrade. Mwa kento yina ya Katolika, ntangu yayi, lendaka zonza ve mpova mosi ya Kingelesi, na yina wapi mutindu yandi ke zaba nani ya kele?” Mu tubaka, “Kwenda kuna, mpe sambila samu na bébé yango, mpe yina ke sepelisa yandi, mpe yandi ke kwenda na ntwala.” Yandi tubaka, “Mpe ya ke sala kima ve. . .” Ya vwandaka kaka makelele ya ntangu nyonso kuna. Yandi vwandaka dumuka, mpe muntu nyonso vwandaka boka. Yandi vwandaka luta na zulu ya mapeka ya bawu, mpe vwandaka kubwa na kati-kati ya bawu. Yandi zolaka kuzwa mwa bametre, mpe na yina bawu zolaka meka na kuvutula yandi kuna; mpe awa yandi lendaka kwisa kuna na kati-kati ya makulu ya bawu, na kusimbaka bébé yayi, vwandaka dasukila ba-huissier mpe nyonso yankaka. Ya vwandaka sala ata luswaswanu ve, yandi vwandaka zola kukuma kuna. Yandi zolaka kuma kuna! Ya ke sala luswaswanu

mosi ve na yina ya vwandaka, yandi zolaka kuma kuna. Yandi vwandaka na longi. . .

<sup>147</sup> Ntangu yayi ya kele ve disolo mutindu kento ya Sunamite? Kaka, ya vwandaka ve na bamvula makumi tatu na tanu me luta. Ya vwandaka pene ya bamvula tatu me luta, to yiya. Beno me mona?

Bawu lenda vwanda mutindu mosi na nkokila yayi. Ntangu kusuka ntima mosi ke telema, ya ke losa zola mpe lukwikilu kuna na ndilu ya bitumba, samu na kulomba yina beno zola, samu ti ya kele nsilulu ya Nzambi ti beno lenda kuzwa yawu. Ya kele kaka kieleka.

<sup>148</sup> Mu balukaka; munu, longi, to evangéliste na kisika yina. Mu me baluka. Mu me kuwaka mawa samu na kento yayi, kasi ya kele ve na kusuka ntima. Beno me mona? Mu balukaka mpe banzaka, “Mbote, Mpangi Jack ke sambila samu na yandi, mpe yina—yina ke sukisa diambu.” Mu balukaka. Mu tubaka, “Mutindu mu vwandaka tuba ntangu yayi, lukwikilu. . .”

Mpe mu talaka kuna, mpe ya vwandaka na vision. Mu monaka mwa bébé mosi ya kuvwanda kuna, mwa kizizi ya ndombe, bébé ya Mexique ya kukondwa meno. Ya vwanda seka munu, ya kuvwanda kuna. Mu tubaka, “Vingila fyoti. Vingila fyoti.” Kusuka ntima ya yandi nataka yandi na Mpeve-Santu samu na kusoba dilongi ya munu, kusoba meso ya munu mpe kutalisa munu bébé ya yandi ya kuvwanda kuna. Yina fidisaka Mpeve. Mu tubaka, “Vingila fioti. Vingila fioti. Natina munu bébé yango.”

Yandi kwisaka awa na mwa bulanketi mosi ya fioti, ya kupola, yina ba me dindisa, ya bleu mpe ya mpembe, mwana mosi, na mutindu ya kufwa pene ya yinda mutindu *yayi*. Yandi kubwaka, na kulunsi na diboko ya yandi, to na rosaire mosi, samu na kutuba ti “mbote na nge Maria.” Mu tubaka na yandi, “Telemisa yawu, yina kele na mfunu ve.”

Mpe yandi belamaka na kisika mu vwandaka, mpe yandi vwandaka boka mpe vwandaka dila, “Padre,” yina zola kutuba, “Tata.”

Mu tubaka, “Kutuba yawu ve. Kutuba yawu ve. Nge ke kwikila?” Mpe bakala yina tubaka yawu na yandi na Espagnole, yandi kwikilaka yawu.

“Yinga,” yandi kwikilaka. Yandi yufulaka yandi wapi mutindu yandi ke kwikila. Yandi tubaka, “Kana Nzambi lenda pesa kiboba ya bakala yina kumona ya yandi, yandi lenda pesa bébé ya munu luzingu.” Amen. Kusuka ntima nataka yandi na yawu. Kima mosi ve na lweka ya munu; mu monaka kaka vision.

Mu tubaka, “Mfumu Yesu, mu monaka vision ya bébé mosi ya fioti, ya lendaka vwanda yayi.”

Kaka na ntangu yina yandi bulaka makulu ya yandi, yandi salaka, “Wa! Wa! Wa!”

Mu tubaka, “Beno nata yandi na dokotolo. Beno baka nsamunu ya kusonika na dokotolo, “Ti bébé yina kufwaka.” Mpe yawu . . . dokotolo sonikaka nsamunu yayi, “Kupema ya bébé yina, ntima sukaka na suka yayi, na kati ya bureau ya munu na ngunga ya yivwa, yandi kufwaka na pneumonie zole.” Oh, bébé kele muntu ya moyo na Mexique na nkokila yayi, landila mutindu mu zaba. Samu na yinki? Kusuka ntima kotaka na kati ya ntima ya mama ya ntwenya, na kudilaka samu na mwana ya yandi, yina monaka Nzambi kusala . . . kubelusa meso ya mpofo, mpe zabaka ti Yandi lendaka vumbula bébé ya kufwa.

<sup>149</sup> Kusuka ntima! “Ntangu beno ke sosa Munu na ntima ya beno ya muvimba, na yina mu ke kuwa beno.” Beno me mona?

<sup>150</sup> Kimfumu! “Musiku mpe bapofete wwandaka tii na Jean. Kubanda ntangu yina, Kimfumu ya Mazulu me longama, mpe bantu ke nwana samu na kukota na Yawu.” Nge ke telema kaka ve mpe ke tuba, “Baka munu na nkingu, Mfumu, kotisa munu.” Beno ke nwana samu na kukota na Yawu. Beno ke suka ntima, na kati-kati ya Luzingu mpe lufwa.

<sup>151</sup> Mu zolaka kuzwa ntangu samu na disolo yankaka, ti mu wwandaka banza kaka ntangu yayi, na kento mosi, mwana-kento, bakaka nzila ya yimbi, mpe mutindu yandi balulaka bapage ya malu-malu mpe nyonso, tii mu tubaka, “Mpangi ya kento . . .”

Yandi telamaka mpe tubaka, “Mu—mu ke kwikila ti mu ke beluka.”

Mu tubaka, “Ve, ve! Vwanda kuna.”

Mpe kuna, kima ya ntete beno zaba, yandi bandaka na kusambila mwa fyoti, mpe mbala mosi yandi bokaka ngolo mingi mpe mingi. Na manima ya mwa ntangu fioti yandi sukaka ntima, yandi tubaka, “O Nzambi, vulusa munu!”

<sup>152</sup> Bantu ya alkole yina ba lenda ve kutanga bankumbu lendaka ve kubelusa yawu. Kima yankaka ve lendaka belusa yawu. Kasi meso ya yandi ya nene, ya ndombe talaka munu, mpe masa ya meso wwandaka kulumuka na matama ya yandi; yandi tubaka, “Kima mosi me salama.” Oh, yinga! Yinga, tata! Kima mosi me salama. Yandi sukaka ntima.

<sup>153</sup> Bika ti beto suka ntima samu na yayi; kati-kati ya lufwa mpe Luzingu.

<sup>154</sup> Kana beno lenda ve kusuka ntima, beno luta ve awa. Kana beno me suka ntima, beno kwisa awa mpe beno tala, beno—beno ke bakula yawu kaka na ntangu beno ke kuma awa.

<sup>155</sup> Beto sambila. Na kati ya kusuka ntima samu na Kimfumu ya Nzambi, Yawu ke kwisa na zulu ya beno.

<sup>156</sup> Tata ya beto ya Mazulu, mu ke sambila Nge na Nkumbu ya Yesu, vwanda na kati ya beto, Mfumu. Mpe banda na kati ya beto kusuka ntima. O Mfumu Nzambi, vwanda na kyadi ya beto, mu ke sambila, mpe bika bantu kusosa Nge na nkokila yayi na bantima yina me suka. Beto zaba ti Nge kele awa, Mfumu. Nge kele mutindu mosi mazono, bubu yayi, mpe kukonda nsuka.

<sup>157</sup> Mpe ntangu yayi ti bantu yayi yina kele na Kidimbu, ti bawu me luta lufwa na Luzingu, bawu me soba na luzingu ya ntama ya yinza na yina ya malu-malu. Ba me sala yawu. Ba me tula Menga; mpe, Nzambi, me pesa bawu kidimbu ya Kidimbu. Ti bawu baka Kidimbu yina na maboko ya bawu, bayina kele ya kubela, kutuba, “Mu kele mbuma ya Nzambi yina ba me sumba. Mu kele na kati ya Klisto, mpe na kati ya Yandi kimbevo kele ve. Mu kele na kati ya Klisto, mpe na kati ya Yandi kele disumu ve. Mu kele na kati ya Klisto, mpe na kati ya Yandi kukondwa lukwikilu kele ve. Mu me yambula mambu nionso yina diabulu me tuba na munu. Mu ke baka Kidimbu ya munu ti munu. . . ‘Yandi lwalaka samu na masumu ya munu; ba nyokolaka Yandi samu na disumu ya munu ya nkú; kitumbu ya ngemba ya munu kubwaka na zulu ya Yandi; mpe na bamputa ya Yandi mu belukaka.’ Mpe ntangu yayi mu me simba Kidimbu, ti Nzambi me zaba munu, lukanu yina, Muntu, sumbaka na nzila ya Menga ya Mfumu Yesu. Mpe mu me simba Kidimbu ya lufwa ya Yandi na maboko ya munu, samu ti Yandi me vumbuka dyaka, mpe mu kele ya Yandi mpe Yandi kele ya munu. Mu ke kwenda na lukwikilu ya kieleka, ti kubanda na nkokila yayi, Mu ke kwikila Nzambi, mpe mu ke beluka ntangu mu ke kuma kuna mpe mu ke zitisa balombilu.”

Samu ti, Bandinga ya nsuka yina kubwaka na bikoba ya Yandi, vwandaka yayi, “Kana bawu tentika maboko na zulu ya bambevo, bawu ke beluka.” Pesa yawu, Mfumu. Bika ti kusuka ntima kukota, samu ti mu me lomba yawu, na Nkumbu ya Yesu. Amen.

Mu lenda, mu ke, mu ke kwikila;  
 Mu lenda, mu ke, mu ke kwikila;  
 Mu lenda, mu ke, mu ke kwikila  
 Ti Yesu ke belusa munu ntangu yayi.

Oh, mu lenda, mu zola, mu ke kwikila;  
 Mu lenda, mu ke, mu ke kwikila;

Beno banza kaka, “Mu me baka lukanu!”

Mu lenda, mu ke, mu ke kwikila  
 Ti Yesu ke belusa munu ntangu yayi.

<sup>158</sup> Beno ke kwikila yawu? “Mu me baka lukanu! Mu me baka lukanu, na lemvo ya Nzambi, ti mu ke sutope ata fioti ve tii kuna Kima mosi ke bula munu. Mpe mu ke kwenda kuna samu ba tentika maboko na zulu ya munu.”

Ntangu yayi, Nzambi me kubwaka na beto ata fioti ve. Mpe mu ke kwikila ti Munganga ya nene kele awa ntangu yayi. Mu

ke kwikila ti Nzambi yina sonikaka Ndinga, mu ke kwikila ti Nzambi yina salaka munkayulu, Mu ke kwikila Kidimbu ya Nzambi yina ke sukulaka beto na disumu na nkokila yayi, Kidimbu, Luzingu ya Yandi Mosi, kele awa na beto. “Mu ke vwanda na beno, tii na nsuka ya yinza. Na mwa ntangu fyoti mpe yinza ke mona Munu dyaka ve, kasi beno ke mona Munu, samu Mu ke vwanda na beno, ata mpe na kati ya beno, tii na nsuka ya yinza.” Beno ke kwikila Yawu? Mu ke tula kivuvu na Yandi. Mu ke kwikila ti Yandi ke sala yawu. Beno ve?

<sup>159</sup> Ntangu yayi, kaka na ntangu mu ke banda yawu, mu ke mona ba-vision ke monika, amen, ba-vision ya nene ya Mfumu, kuzonza bima ya nene. Amen! Kana mu banda yawu, beto ke vwanda awa mpimpa nyonso. Beno ke kwikila yawu? Beno ke kwikila? Amen! Mu ke kwikila yawu na ntima ya munu ya muvimba.

<sup>160</sup> Mama yayi ya ntwenya me vwanda kuna na Mpangi Palmer, yandi kele nzenza samu na munu. Yandi me katuka na Georgie, mpe yandi ke na kimbevo ya bakento. Kana yandi ke kwikila ti Nzambi ke belusa yandi, Yandi ke sala yawu. Mu me monaka ntete ve kento yayi na luzingu ya munu, kasi ya kele yina kele dyambu na yandi.

<sup>161</sup> Mwa kento yina, mu zaba ve kana yandi kuwaka Nsangu na ntwala, to ve, kasi na yina mu vwandaka longa awa, mu monaka yandi. Beno kwikila kaka yawu mpe beno tala kana ya kele kieleka. Amen. Kana beno ke kwikila kaka! Ya kele kieleka.

<sup>162</sup> Mama yina me vwanda awa na manima na mpasi ya mukongo, yandi ke na mpasi mingi, nkumbu ya yandi kele Mama Wisdom. Kana nge ke kwikila na ntima ya nge ya muvimba, Yesu Klisto ke belusa nge. Mu me monaka ntete ve kento yayi na luzingu ya munu, kasi yandi kele ya kuvwanda kuna, ke na kubela. Yandi me lwata robe ya jaune. Ya kele kieleka? Mbote mingi. Beto kele banzenza mosi na yankaka? Yinga. Mbote mingi, tata. Vutuka na yinzo, beluka. Yesu Klisto me belusa nge. Amen.

<sup>163</sup> Kento yankaka yina me simba kaka yawu, mpasi ya mukongo, ya kuvwanda awa. Yandi kele na mpasi ya mukongo. Yandi kele na mwana ya bakala, mpe yandi kele na mpasi na yintu. Uh-huh. Ya kele kieleka. Mama Parker kele nkumbu ya yandi. Nge ke kwikila na ntima ya nge ya muvimba, mpe Yesu Klisto ke belusa nge mbala ya zole. Amen! Nge kele banzenza samu na munu. Ya kele kaka kieleka. Amen! Beno kwikila na ntima ya beno ya muvimba.

<sup>164</sup> Awa kele bakala ya kukula yina kele ya kuvwanda na manima awa mpe yandi me katuka na Michigan. Yandi kele na mpasi na makutu ya yandi. Oh, yandi ke banza bandinga, mpasi ya kimpeve. Ya kele kieleka? Nge ke kwikila ti—ti. . . Nge zaba ve kana ya kele Nzambi, to yina ya ke na kuzonzaka na nge. Nge ke kuwa makelele ve na makutu ya nge. Mu kele nzenza ya muvimba



samu na nge. Kana ya kele kieleka, telemisa maboko ya nge, mpe ya kele yina ke na kusalamaka. Ata mbala mosi dyaka ve ti ya ke kwamisa nge, Yesu Klisto ke belusa nge.

Nge ke kwikila Munganga ya nene?

<sup>165</sup> Mu ke tuba na nge, kasi, na Norvège, mpe nge ke bakula ve; na ndinga ya Norvege. Uh-huh. Mbote mingi, tuba na yandi na kukwenda na yinzo, na kukwikilaka, mpangi ya kento, kana nge zaba mutindu ya kuzonza yawu. Tuba na yandi ti kimbevo ya yintu ya yandi ke bika yandi. Ntangu yayi, nge zaba ti mu zaba yandi ve. Yandi me katuka awa na Norvège, samu ba sambila yandi. Vutuka, bakala ya mavimpi ya mbote. Amen.

<sup>166</sup> Oh! “Yesu Klisto mutindu mosi mazono, bubu yayi, mpe kukonda nsuka!” Yinki ya kele? Ya kele Dikunzi ya Tiya yina. Ya kele Mpeve-Santu. Ya kele Kidimbu yina, ti Yesu Klisto kele moyo. Mpe ntangu bantu, ntama mingi ve, monaka Yandi kusala bima yina, Yandi zabaka mabanza ya bawu samu Yandi kele Ndinga. “Mpe Ndinga kele ya meno mingi kulutila mbele ya meno zole, mpe muswasikisi ya mabanza mpe bansatu ya ntima ya bawu.” Amen.

<sup>167</sup> Mu monaka masa vwandaka sema, mpe mwana-bakala yayi ya ntwenia vwandaka kwisa. Yandi kuwaka, mpe tangaka buku mosi kuna, mpe sonikaka, na Norvège. Yandi bandaka na kubakula; muntu mosi tubaka na yandi. Yandi ke na kimbevo, kasi, kana yandi ke kwikila na ntima ya yandi ya muvimba, Mfumu Yesu ke belusa yandi. Yandi me kwiza nzila ya yinda, mpe mwana ya mputu, na yawu, na kumekaka na kusala ngolo. Mpe beto ke tentika maboko na zulu ya yandi, na mwa minuti fioti.

<sup>168</sup> Beno ke kwikila? Amen! Mutindu ya kele mbote! Oh, la la! “Munganga ya nene kele awa ntangu yayi.” Mpangi-kento, wapi kisika kele Mpangi-kento Ungren, mpe mpangi-kento yina yankaka na piano? Mu zola ti beno kwisa na nswalu nionso, kana beno zola, mpe beno pesa beto nkunga mosi, “Munganga yina ya nene kele awa ntangu yayi, Yesu yina ke kabulaka mpasi.”

<sup>169</sup> Mu zola bantu yina kele na lweka yayi ya kulwale *awa*, bayina zola ti ba sambila samu na bawu, na lutondo beno kulumuka na lweka yayi *awa*, kaka kulwale mosi na ntangu mosi. Mpangi Neville, nge ke sala yawu kana nge zola. Wapi kisika kele Mpangi Capps to mosi ya bantwadisi ya bankunga yango? Wapi mutindu samu na Mpangi Ungren, to Mpangi Capps, to muntu mosi, kukwisa awa, yandi ke yimba, twadisa nkunga yayi samu na beto kana beno zola. Ya kele Mpangi. . . Wapi kisika kele mosi ya bampangi yango? Mbote mingi. Mbote mingi, tata, ya kele mbote. Mbote mingi. Muntu nyonso vwanda na kisambu!

<sup>170</sup> Beno bambuka moyo, kusuka ntima! Beno me mona yina kusuka ntima ke sala? Kusuka ntima ke nata beno na simu ya mubu. Kusuka ntima ke nata beno kitezo yankaka. Kusuka

ntima ke nata beno konso kisika yina. Kiboba ya tata mosi ya ntalu mpe mwana ya yandi ya kento, na kusuka ntima, mekaka na kukota, kukota, bisika yankaka nionso, mpe me vwanda na mutindu nyonso; mwa ntangu fyoti me luta Mpeve-Santu me vulusa kima yango awa na lukutakanu, kaka na ntwala mu kota awa. Oh!

Muingu ya kulutila lembami yina ba me  
yimbaka ntete ve,  
Yesu, lusakumunu na Yesu.

Munganga ya nene kele awa ntangu yayi,  
Ke kabulaka mpasi . . .

Mfumu Yesu, pesa, wa kisambu ya kisadi ya Nge, Mfumu. Mu ke sambila ti Nge ke kutana na mosi na mosi ya bayayi mpe ke belusa bawu, samu na Nkembo ya Nge, na Nkumbu ya Yesu.

. . . ndinga ya Yesu.

Noti ya kulutila lembami na mukunga ya selafa,  
Nkumbu ya kulutila lembami na zulu ya yinwa ya yina ke kufwa,  
Oh, muingu ya kulutila lembami yina ba me yimbaka ntete ve.

Bika ti bayina nionso me suka ntima ntangu yayi, bayina zaba ti beno ke beluka . . . Beno banza kaka, landila mutindu mu zaba, nkama na zulu ya nkama vwandaka, kubanda na Lumingu me luta na nkokila, yandi belukaka na sabala yayi.

Yina ke kabulaka mpasi . . .

<sup>171</sup> Beno tala mbote, Yandi ke kwiza. Beno me mona, Yandi me belusa beno yimeni. Yandi ke nata Ndinga ya Yandi, Yandi ke siamisaka Yawu, Yandi ke lakisaka Mvwandulu ya Yandi. Muntu ve lenda sala bima yina na ngaanda ya Nzambi. Beno zaba yawu. Ya kele kidimbu ya Mesiya. Mpe beno zaba ti mu kele ve Mesiya, na yina ya kele Yandi. Ntangu yayi awa Yandi me siamisa nyonso na beno.

Ntangu yayi ya fwana losa beno na kati ya kusuka ntima. Ya fwana ningisa kisika yayi mpe kusimba . . . Ve, kaka kuvwanda mutindu zalumeti na kinkuku ya pude. Kieleka! Mpe ya zolaka pasula lukwikilu, mpe—mpe zola mpe kusuka ntima ke nata bantu na Kimfumu ya Nzambi, samu na kukwikila na ntima ya bawu ya muvimba. Beno ke kwikila ntangu yayi, beno nionso? Mbote mingi. Ntangu yayi, Billy, nge ke . . .

<sup>172</sup> Tony, tala munu awa minuti mosi. Mu me monaka nge ve kubanda ntama, kasi nge kele mbevo. Nge ke na kimbevo ya kima mosi mutindu dysenterie. Ya kele kieleka. Ya ke katuka. Ya ke bika nge. Mu monaka kima yina vwandaka landa yandi, na yina yandi bandaka kuna. Ya kele ve na kima yina ba lendaka bumba na Nzambi na ntangu yayi. Mu me monaka ntete ve . . .

Mu me monaka ve Tony bangonda, mu banza, kasi mu me mona ti yandi ke na yawu. Yandi me kuzwa yawu; yandi ke na yawu ve ntangu yayi.

<sup>173</sup> Beto kulumusa bayintu ya beto. Disu mosi ve kuvwandaka ya kuzibula. Disu mosi ve kutala. Beto nionso kuvwanda na kisambu. Mpe Billy Paul to Mpangi Neville, mosi, ke bokila bandonga yina ke landa ntangu ya ke kuma ntangu. Ntangu yayi muntu nionso kusambila. Beto ke meka ntangu yayi; kulwale ya kati-kati ke kwiza na lweka ya beno ya diboko ya kikento ntangu ba ke bokila beno, mpe na yina kulwale yayi ya diboko ya kikento *awa* ke kwisa na lweka ya diboko ya beno ya kikento ntangu ba ke bokila beno. Mpangi Neville ke bokila nge.

Ntangu yayi, mu ke kukiyufula kana ya kele na mosi ya bampangi awa yina ke zola kutelama awa samu na kutentika maboko na zulu ya bantu yayi na yina ba ke kwisa, na munu? Mosi ya beno bampangi ya milongi, mu ke zodila beno kukwisa ya mbote mpe beno telama na munu kana beno zola kusala yawu. Yawu ke kima ya kingenga ve. Beno ke na muswa ya kusambila samu na bambevo mutindu mosi na munu.

Mu zaba ti Mpeve-Santu kele awa. Muntu nyonso yina ke kwikila yawu ve, ya kele na kima mosi ke tambula mbote ve na bawu.

<sup>174</sup> Mbote mingi, beto kwikila ntangu yayi na bantima ya beto nyonso, ti Nzambi ke pesa bima yayi yina beto ke na kulomba. Beno vwanda na lukwikilu ntangu yayi. Beno tula ntembe ve.

Mpe muntu nyonso kusambila, mosi samu na yankaka. Yinki Biblia me tuba? “Beto funguna bafoti ya beto na mosi na yankaka; beto sambila mosi samu na . . .”

<sup>175</sup> Mpe beno bantu ke kwisa na ndonga, na ntangu maboko yayi ke simba beno, beno ke basika awa kaka na kiese mpe ke kembila Nzambi ti beno me beluka.

Mbote mingi, muntu nyonso vwanda na kisambu ntangu yayi na yina Mpangi Capps ke twadisa minkunga.

Mfumu Yesu, ntangu yayi sadisa beto. Mu ke sambila, na Nkumbu ya Yesu Klisto, ti Mpeve-Santu ke simba muntu nyonso, mpe bika ti bawu beluka mutindu beto ke landa misiku ya Nge samu na kutentika maboko na zulu ya bambevo. Nge tubaka, “Bawu ke beluka.” Beto ke kwikila yawu, Tata, na Nkumbu ya Yesu. Amen.

Mbote mingi, muntu nyonso vwanda na kisambu ntangu yayi na yina beto ke banda na kusambila. Ntete, ya kele mwana ya bakala ya kubela na fauteuil roulant.

Na kutentika maboko na zulu ya mwana yayi, na Nkumbu ya Yesu Klisto, ti yandi ke beluka.

Yinga, tata.

Na Nkumbu ya Yesu Klisto...[Ndonga ya bisambu me wumela baminuti kumi na nana, bampova ya Mpangi Branham ke na kuwakana ve—Mu.]...?...

Muingu ya kulutila lembami yina ba me  
yimbaka ntete ve,

Yesu, lusakumunu na Yesu.

<sup>176</sup> Bantu yikwa na kati ya beno ke kwikila ti Nzambi me, beno me ndima kieleka na kati ya ntima ya beno, na kivuvu ya kukangama, ti Nzambi me pesa mvutu na lombilu ya beno samu beno me tumama na Ndinga ya Yandi? Ya me salama. Ya me suka. Ya me—ya me salama. Beno kwikila Yandi na ntima ya beno ya muvimba, ti ya kele kisalu ya kumana.

<sup>177</sup> Ntangu yayi beno tala mbote sabala yayi, mpe ntangu beno ke vutuka dyaka, beno tala mbote yina me salama.

<sup>178</sup> Mu banza, na ntangu ke kwisa mu ke vutuka, kana Mfumu kuzola, mu ke twadisa ndonga ya bisambu na kati ya mosi ya bivinga yayi, na kati ya mwa kivinga yina mu fwana nata bawu, beno me mona. Mu ke kwikila ti ya ke na kuzibuka ntangu yayi, beno me mona, ngunga.

<sup>179</sup> Mu zola kuma na kisika yina mu lenda nata bantu na ntangu mosi, kusala na mosi na mosi ya bawu, tii kuna mu ke tala yawu mpe ke mona yawu, mpe na manima kukwenda na ntwala mutindu yina, tii mu ke vwanda kaka na bawu na ntangu yina.

<sup>180</sup> Nzambi sakumuna beno nyonso. Beto kele na kyese mingi ti beno vwandaka awa. Beno me kuzwa...? Beno kele ya kukwikama ntangu yayi? Beno...? Beno me suka ntima, kusuka ntima ya beno yina beno me kuzwa samu na kubeluka ya beno? Ya me suka ntangu yayi, na zola mpe lukwikilu mpe kivuvu ti Nzambi ke sala yina Yandi silaka na kusala? Nzambi ke sala.

Kubanda na bana yina ya fioti, kele na zole to tatu na kati ya bawu awa na nkokila yayi, na bakiti ya bambevo, mu...Beto ke kwikila samu na bawu, ba kele bana, ti ba ke beluka, mpe. Ba ke beluka. Beno kwikila yawu ve? Amen! “Bawu ke beluka.” Bawu fwana sala yawu. Nzambi tubaka mutindu yina. Mpe beto me suka ntima, mpe beto ke kwikila yawu ntangu yayi, ti ya ke salama.

<sup>181</sup> Ntangu yayi, balukutakanu ya beto ke na kukotisa kaka kima mosi na manima yankaka. Ntangu yayi beto ke bika bantu yina fwana kukwenda. Mpe kulutila mbote mu lenda mona, ya kele pene ya baminuti nana tii na ngunga kumi. Mpe, kana beno fwana kwenda, beto—beto kele na kyese ti beno vwandaka awa, mpe beto zola ti beno vutuka mpe kuvwanda na beto. Bayankaka na kati ya beno, na manima beto me telama, ke vwanda dyaka; mpe bayina ke na kwenda, beno ke kwenda kaka na malembe mutindu ya lenda salama. Mpe kuna beto ke sala kisalu ya kominyo na mbala mosi na manima ya yawu. Ba me bokila beno na kuvwanda kana beno lenda. Kana beno lenda ve, Nzambi

sakumuna beno. Sambila samu na munu. Mu ke sambila samu na beno. Mpe, beno bambuka moyo, beno bumba Kidimbu yina ba me tula, mpe beno vwanda ya kukangama na Kimfumu ya Nzambi. Amen!

Ntangu yayi beto ke yimba nkunga ya beto ya kusukisa, kana beto lenda, mpe, *Baka Nkumbu Ya Yesu Na Nge*, na yina beto ke telama.

. . . Nkumbu ya Yesu na nge,  
 Nge mwana ya mawa mpe ya kiadi;  
 Ya ke pesa kyese mpe kikesa ke pesa . . . (Beno  
 lenda nata bawu ntangu yayi.)  
 . . . Yawu bisika nyonso nge ke kwenda.  
 Nkumbu ya ntalu, (Nkumbu ya Ntalu!) O  
 Nkumbu ya kitoko! (O Nkumbu ya kitoko!)  
 Kivuvu ya ntoto mpe kyese ya Mazulu;  
 Nkumbu ya ntalu, O Nkumbu ya kitoko!  
 (Nkumbu ya kitoko!)  
 Kivuvu ya ntoto mpe kyese ya Mazulu.

Beno pesana mbote mosi na yankaka, beno tuba, “Mfumu sakumuna nge, mpangi ya munu ya bakala, mpangi ya munu ya kento.” Na mudindu, ya kieleka, na luzitu nionso, mpe bankundi ya Baklisto na kati ya ngwisani, beno pesana mbote mosi na yankaka, mpangi ya bakala mpe mpangi ya kento. Nzambi sakumuna beno nyonso, kintwadi. Mbote mingi!

Mu zola Yandi, mu zola Yandi  
 Samu Yandi zolaka munu ntete  
 Mpe futaka mpulusu ya munu  
 Na yinti ya Calvaire.

Tii beto ke kutana! tii beto ke kutana!  
 Tii beto ke kutana na makulu ya Yesu; (Tii kuna  
 beto ke kutana!)  
 Tii beto ke kutana! Oh, tii beto ke kutana!  
 Nzambi kuvwanda na beno tii beto ke kutana  
 diaka.

Tii beto ke kutana! tii beto ke kutana!  
 Tii beto ke kutana na makulu ya Yesu; (Tii kuna  
 beto ke kutana!)  
 Tii beto ke kutana! tii beto ke kutana!  
 Nzambi kuvwanda na beno tii beto ke kutana  
 diaka.

<sup>182</sup> Lembami yayi mpe kubundana ya Kidimbu ya nene ya Nzambi, Mpeve-Santu, bika ti Yandi vwanda ya muvimba na beno nionso tii beto ke kutana dyaka. Lemvo ya Nzambi ke kwenda na beno, ke bula banzila ya lufwa na ntwala ya beno; samu na kukumisa beno pwelele, ti beno lenda mona Yesu ntangu nyonso na ntwala ya kizizi ya beno, mpe ti beno ke ningana ve.

<sup>183</sup> Tata ya Mazulu, beto ke pesa ksalu yayi, mpe lukutakanu na suka yayi, balukutakanu yina mpe yina me salama, mpe nkembo nyonso na Nge, na kupesaka Nge matondo mpe samu na mpulusu ya bantu, mpe samu na kubeluka ya bantu, mpe samu na kupesa beto lemvo ya Nge ya nene yina beto nyonso ke tala. Vulusa beto. Mutindu beto ke tonda Nge samu na yayi. Vwanda na beto ntangu yayi tii beto ke kutana diaka. Kutana na beto na kominyo. Vwanda na zulu ya piné ya bayina ke tambula na ditoma, Mfumu, samu na kuvutuka na bayinzo ya bawu. Twadisa bawu na kati ya bakonze yayi ya kigonsa, ti mpasi ve mpe kigonsa ve ke kwisa na bawu. Na Nkumbu ya Yesu Klisto beto me lomba yawu. Amen.

Mbote mingi, *Baka Nkumbu Ya Yesu Na Nge* dyaka.

Baka . . . Nkumbu ya Yesu . . .

Beno me basika ntangu yayi, na Nkumbu.

. . . na beno,

Mutindu Kinwaninu ya ngolo;

Ntangu bampukumunu ke kumaka beno . . .

(Yinki beno ke sala?)

Beno niunguta kaka Nkumbu yina ya Santu na kisambu.

Nkumbu ya ntalu, (Nkumbu ya Ntalu!) O

Nkumbu ya kitoko! (O Nkumbu ya kitoko!)

Kivuvu ya ntoto mpe kyese ya Mazulu;

Nkumbu ya ntalu, (Nkumbu ya Ntalu!) O

Nkumbu ya kitoko! (Nkumbu ya kitoko!)

Kivuvu ya ntoto mpe kyese ya Mazulu.

Beto ke fukimina Nkumbu ya Yesu,

Beto ke fukama na makulu ya Yandi,

Samu na kubyadisa Yandi ntinu ya bantinu na Mazulu,

Ntangu nzietolo ya beto ke suka.

Nkumbu ya ntalu, O Nkumbu ya kitoko!

Kivuvu ya ntoto mpe kyese ya Mazulu;

Nkumbu ya ntalu, O Nkumbu ya kitoko!

(Nkumbu ya kitoko!)

Kivuvu ya ntoto mpe kyese ya Mazulu.

<sup>184</sup> Ntangu yayi kaka ntete beno vwanda, na yina bantu ke na kukuma swi ntangu yayi samu na ksalu ya kominyo.

Kana mu me zimbana ve, ya kele ve Mpangi Blair, longi yina mu kutanaka na Arkansas ntama mingi ve? Mu banzaka ti ya vwandaka. Mu vwandaka ndima ve. Nge vwandaka awa samu na mbiekolo ya mwana, mwana-bakala ya fioti, na suka yayi. Mu banzaka . . . Mu kutanaka na beno ntama mingi ve, awa na Armour ya Tiya, na Arkansas? Na beno vwandaka . . . Kima mosi zolaka salama, mpe Mpeve-Santu bokilaka yawu na kubasika.

Ya vwandaka kieleka? Mbote. Mu kaka. . . Mu me banda na kubanza kuna na manima, mu banzaka, “Ya kele mpangi ya bakala yina.” Mu kele na kyese ti beno kele awa, Mpangi Blair.

<sup>185</sup> Ntangu yayi mu ke lomba na Mpangi Blair kana yandi sambila samu na Nzambi na kukumisa beto ya kuvedila ntangu yayi samu kominyo yina ke zola kusalama. Nge zola, Mpangi Blair? [Mpangi Richard Blair me sambila—Mu.] Yinga. Yinga, Mfumu. Pesa yawu, Mfumu. Yinga, Mfumu. Yinga, Mfumu. Yinga, Mfumu. Yinga. Yinga. Amen.

Beno lenda vwanda ntangu yayi, mosi na mosi.

<sup>186</sup> Mpe ntangu yayi na orgue, mpangi ya kento, kana beno nyonso bula kaka *Ya kele Na Yinto Ya Kufuluka Na Menga*. Mpe beno lenda banda. . . baka yawu kuna, nyonso yina kele mfunu. Mbote mingi, kutanga ntangu yayi, kana beto ke vwanda kaka. . . vwanda swi mwa ntangu fyoti.

Yinga, mpangi-kento? [Mpangi ya kento mosi me tuba, “Beno kuzwa mbutukulu ya munu?”—Mu.] Mbote mingi, mpangi ya kento, nge ke tala kaka awa tii nge ke mona yawu, ya ke vwanda mbote mingi kuna, nyonso yina ya kele kuna. Yawu yina? Mbote mingi, mpangi ya kento.

<sup>187</sup> Mbote mingi, ntangu yayi Mpangi Neville ke tanga ntumunu ya kominyo.

Mpe kuna ba-huissier ke kwiza, kana ya kele na banzenza awa, na konso kiti, mpe beno nata na kulwale na manima ya kulwale, mutindu beto ke kwisa, mpe ndonga na manima ya ndonga, samu na kominyo.

<sup>188</sup> Mpe ntangu yayi ti beno banza ntangu yayi. Beno bambuka moyo, Israel kudiaka yawu na kati ya kusuka ntima, mpe na nzietelo ya vwandaka ve na muntu mosi ya kulemba na kati ya bawu, na nsuka ya bamvula makumi yiya. Yayi kele kubeluka ya Kinzambi, mpe.

Mfumu sakumuna nge, Mpangi Neville. [Mpangi Neville ke na kutangaka Corinthiens ya Ntete 11:23-32—Mu.]

*[Ya kieleka ndongosolo yina mu kuzwaka na sika ya Mfumu mpe yina mu zabisaka beno kele mutindu yayi, Na mpimpa ya kilumbu yina ba yekulaka Mfumu Yesu yandi bakaka dimpa:]*

*[Mpe ntangu yandi vutulaka matondo, yandi bukaka yawu, mpe tubaka, Beno baka, beno kudia: yayi kele nzutu ya munu, yina mu ke na kupesa samu na beno: beno sala mutindu yayi samu na kubambukila munu moyo.]*

*[Na manima ya mutindu mosi mpe yandi bakaka mbungu, ntangu yandi bakaka mbungu, na kutubaka, Mbungu yayi kele ngwisani ya malu-malu na menga]*

*ya munu: beno sala yawu, ntangu nyonso yina beno ke kunwa yawu, beno bambuka moyo na munu.]*

*[Ya kieleka konso ntangu yina beno ke kudia dimpa yina, mpe beno ke kunwa mbungu yina, beno ke zabisa nsangu ya lufwa ya Mfumu tii ntangu yandi ke vutuka.]*

*[Yawu yina muntu yina ke kudia dimpa, to ke kunwa mbungu ya Mfumu, na nkadulu ya kulunga ve, yandi ke sala disumu na nzutu mpe menga ya Mfumu.]*

*[Na yina konso muntu fwana kuyindula na kati ya ntima ya yandi wapi mutindu kele nkadulu ya yandi, ntete na kudia dimpa mpe kunwa mbungu yina.]*

*[Ya kieleka muntu yina ke kudia dimpa mpe ke kunwa mbungu ya Mfumu kukondwa kuzaba ti, ya kele nzutu ya Mfumu, ke kuzwa kitumbu na sika ya Nzambi.]*

*[Yawu yina na kati ya beno kele na bambevo mingi mpe bantu ya banzutu ya kulemba, mpe ti lutangu ya nene ya bantu me kufwaka.]*

*[Kana beto tala ntete na kati ya ntima ya beto wapi mutindu kele nkadulu ya beto, Nzambi ke fundisa beto ve.]*

*[Kasi ntangu Mfumu ke fundisaka, yandi ke sembaka beto samu ti beto kuzwa ve kitumbu kintwadi na bantu ya yinza.]*

*[Mfumu sakumuna lutangu, Ndinga.]*

<sup>189</sup> Mu me simba dimpa kascher, ya ngolo mpe ya kubukana, yina ke na kumonikisaka nzutu ya Yesu Klisto; na nzila—na nzila ya vwale yina pasukaka beto me kuzwa muswa ya kukota na bisika ya kulutila Busantu.

<sup>190</sup> Tata ya beto ya Mazulu, dimpa yayi me kubama samu na kutalisa nzutu yina ya kubukana mpe ya mpasi. Bika ti mosi na mosi ya beto, mutindu beto ke kuzwa yawu, bika ti ya vwanda mutindu ti beto na mutindu ya kieleka me sala kisalu yayi. Mpe ti beto kuzwa mulemvo ya masumu ya beto, mpe muswa ya kukota na kisika ya kulutila Busantu, samu na kuzinga na Mvwandulu ya Nge na luzingu ya beto ya bilumbu ke kwisa na ntwala; mpe bilumbu nyonso yina beto ke zinga awa na zulu ya ntoto, mpe kuvwanda na Nge na Seko kukonda nsuka. Pesa yawu, Tata. Sakumuna dimpa yayi samu na lukanu yina ke vingila. Na Nkumbu ya Yesu. Amen.

<sup>191</sup> Biblia ke tuba, “Na manima Yandi me baka mpe me buka dimpa, mutindu Yandi bakaka mbungu; mpe ntangu Yandi bakaka madia ya nkokila, na kutubaka, ‘Yayi kele mbungu ya Ngwisani ya Malu-malu na kati ya Menga ya Munu, yina basikaka samu na beno.’” Bika ti Mfumu kubwela balusakumunu ya Yandi na zulu ya yayi na yina beto ke sambila.



<sup>192</sup> Mfumu Yesu, mu me simba awa menga ya vinu, zi ya vinu. Mpe, Tata, ya kele samu na kumonikisa Menga yango ya ntalu yina ke sukula beto, ti katuka Kuna me kwiza Kidimbu. Mu ke tonda Nge samu na Yawu, Tata, mpe samu na kidimbu yayi. Nge tubaka, “Yandi yina ke kudya mpe ke kunwa Yayi kele na Luzingu ya kukonda nsuka, mpe Mu ke vumbula dyaka yandi na ntangu ya nsuka.” Beto ke tonda Nge samu na nsilulu yayi. Mpe, Tata, beto ke sambila ti Nge sukula bantima ya beto, kintwadi, ti beto ke vwanda ya kulunga na . . . lukwikilu ya beto; na kuzabaka ti na beto mosi beto kele ve ya kulunga, kasi lukwikilu ya beto ke kubwa ve, ti beto ke na kundima na mutindu ya kulunga Menga ya Yesu Klisto. Pesa yawu, Tata.

<sup>193</sup> Mpe santisa vinu yayi samu na lukanu ya yawu. Ti muntu nyonso yina ke kunwa vinu yayi na nkokila yayi, mpe ke baka dimpa yayi, ke kuzwa ngolo samu na nzyetolo yina kele na ntwala. Pesa yawu, Mfumu. Bika ti bawu vwanda na mavimpi ya mbote mpe na ngolo, mpe bawu fuluka na Mpeve ya Nge, tii kuna Yesu ke kwiza. Amen.

<sup>194</sup> [Kisika ya mpamba na bande—Mu.] Mu ke kwikila ti Kominyo kele mosi ya bisambu ya kulutula mfunu, ya kulutula busantu, ya kulutula lembami yina kele na kati ya kisalu ya dibuundu. Ya vwandaka na bima zole yina bikanaka na beto, bima tatu, samu na kusala, yina—yina kele bantumunu mpe balutumumu. Bantu mingi ke mekaka na kutuba, “Beto kele na nsoso ya kisina.” “Beto kele na kitini ya kulunsi.” Kasi ya vwandaka na bima tatu me bikana: Madia ya Mfumu, Mbotika, Kusukula makulu, ya vwandaka bantumunu tatu yina me bikana na dibuundu.

<sup>195</sup> Mpe samu na munu, na nkokila yayi ya monanaka ti ya vwandaka ntangu mosi ya luswaswanu samu na munu. Mutindu mu vwandaka ya kutelama awa mpe vwandaka tala kaka mbote; na mumesanu mu—mu ke vwandaka ntangu nyonso na kisambu. Kasi na nkokila yayi, na kutalaka mabuta ya mutindu na mutindu, samu na kutala mwa mabuta ya bawu me kwiza awa tuka mu vwandaka mulongi ya bakala, kutelama awa na putulu ya mpusu ya mabaya, mpe mu . . . bayankaka na kati ya bawu kele ya malu-malu. Kasi kutala babakala ke kwiza na mwa bakento ya bawu mpe mabuta ya bawu, mpe kumona mutindu bawu kele na mvibudulu mosi na yankaka, mpe mutindu ya busantu ya yawu, mutindu bawu ke talaka mbote bana ya bawu; kumona mama ya ntwenya mpe maboko ya yandi ya kutanda, mpe kubanza, “Mwa diboko yango me sukula, mpe me kusuna maza ya meso na meso ya bébé.”

<sup>196</sup> Na manima mu monaka mabuta me kwisa ti mu vwandaka na bayinzo ya bawu ntangu bawu vwandaka mbevo, mpe bana, vwandaka na tiya ya nzutu; Mfumu Yesu belusaka bana ya bawu. Mu monaka bawu ntangu bawu kuzwaka mpasi na mabuta, Mfumu sadisaka munu na kulembika yawu; kumona bawu dyaka

na kiese. Mpe mu banza kaka mutindu ya ke vwanda ntangu beto ke kwenda na Madya yina ya nene ya Makwela. Mu ke vutula matondo mingi ti Mfumu me pesa munu muswa ya kuvwanda nkundi ya beno mpe kusadisa beno. Mu . . . ya kele samu na yina mu kele awa.

<sup>197</sup> Mpe munu, mu ke banza kaka bantangu yikwa, bamvula yikwa; yayi kele pene, mu bandaka na kulonga, pene ya mvula 1930, mpe yayi kele pene ya bamvula makumi tatu na zole samu na munu, ntangu yayi, bamvula makumi tatu na tatu, mu vwanda longi. Na yina, bamvita nyonso mpe bakumekama mpe, ya ke monana mutindu, ntangu—ntangu beto ke mata awa, beto ke zimbanu yawu—yawu nyonso. Beno me mona? Beno—beno ke monana kaka mutindu ti ya kele na kima na yina me tala Kominyo ke katula kaka bandandani nyonso—nyonso ya bima, samu na kubaka Kominyo. Mfumu sakumuna beno.

<sup>198</sup> Kuluntu ntangu yayi kele kukwenda, tanga Masonuku samu na kisalu ya kusukula makulu.

<sup>199</sup> [Mpangi Neville ke na kutangaka Jean 13:2-17, mpe ke kanga lukutakanu—Mu.]

*[Mpe na nsuka ya madia ya nkokila, diabulu kotaka ntangu yayi na ntima ya Judas Iscariot, mwana ya Simon, samu na kuyekula yandi;]*

*[Yesu na kuzabaka ti Tata pesaka bima nyonso na maboko ya yandi, mpe ti yandi katukaka na Nzambi, mpe kwendaka na Nzambi;]*

*[Yandi telemaka na mesa ya madia, mpe katulaka mvwela ya yandi; mpe yandi bakaka lisume, mpe vingaka yawu na luketo.]*

*[Na manima ya yina yandi tulaka masa na kati ya basini, mpe bandaka na kusukula makulu ya bilandi, mpe samu na kukusuna bawu na lisume yina yandi vingaka na luketo.]*

*[Na manima yandi kwizaka na Simon Pierre: mpe Pierre tubaka na yandi, Mfumu, nge ke sukula makulu ya munu?]*

*[Yesu vutulaka mpe tubaka na yandi, Yina mu ke sala nge ke zaba yawu ve ntangu yayi; kasi nge ke zaba na manima.]*

*[Pierre tubaka na yandi, Nge ke sukula makulu ya munu ata fioti ve. Yesu pesaka yandi mvutu, Kana mu sukula nge ve, nge ke vwanda ve na kima na munu.]*

*[Simon Pierre tubaka na yandi, Mfumu, kaka makulu ya munu ve, kasi diaka maboko ya munu mpe yintu ya munu.]*

[Yesu tubaka na yandi, Yandi yina ba me sukula kele ve na nsatu ya kusukula makulu ya yandi, kasi yandi kele ya muvimba ya kuvedila: mpe beno kele ya kuvedila, kasi beno nyonso ve.]

[Samu yandi zabaka nani ke teka yandi; na yina yandi tubaka, Beno nionso kele ve ya kuvedila.]

[Na yawu na manima yandi me sukula makulu ya bawu, mpe me baka bilele ya yandi, mpe yandi me vwanda diaka, yandi tubaka na bawu, Beno me zaba yina mu me sala na beno?]

[Beno ke bokilaka munu Mulongi mpe Mfumu: mpe beno ke tuba mbote; samu ti mu kele mutindu yina.]

[Kana munu, Mfumu ya beno mpe Mulongi, me sukula makulu ya beno; beno fwana sukula mpe makulu ya beno.]

[Samu Mu me pesa beno mbandu mosi, samu beno sala mutindu mu me sala na beno.]

[Ya kieleka, ya kieleka, mu ke tuba na beno, Kisadi kele ve ya kulutula nene mfumu ya yandi; to muntu yina ba me fidisa kulutula nene muntu yina me fidisa yandi.]

[Kana beno zaba bima yayi, kiese beno ke vwanda kana beno zaba yawu.]

[Ti Mfumu sakumuna lutangu ya Ndinga ya Yandi.]

[Mutindu bantu mingi ke kwisa, babakala ke sukula makulu na kivinga yayi, awa; mpe bamama ke sukula makulu ya bawu na kati ya kivinga yina kele na diboko ya kikento, awa, na kati ya mwa kivinga ya mbotika. Kiese mingi na kumona bantu mingi ke zola, mpe lenda, kukwisa na beto na kisalu ya kusukula makulu yayi.]

[Beto ke telama kintwadi? Samu ti bayina fwana kwenda.]

[Diaka beto ke tuba ti beto ke vutula matondo mingi mpe beto ke sepela na ntwala ya Nzambi samu na kilumbu yayi ya mbote, yina ke pesa kikesa na ntima ya beto, na kumonaka Mvwandulu ya nene mpe ya ngolo ya Nzambi ya beto kukwiza na kati-kati ya beto na kuvwanda awa samu na kupesa beto ngolo mpe kusakumuna beto.]

[Na yina beto ke kulumusa bayintu ya beto kintwadi, beto ke lomba na Mpangi Earl Martin kana yandi katula bayina kele na nsatu fwana kwenda.]



*KUSUKA NTIMA* KNG63-0901E  
(Desperations)

Nsangu yayi ya Mpangi William Marrion Branham, kulongamaka na Kingelesi, na Lumingu na nokila, na kilumbu ya 1 ya Ngonda ya yivwa, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)